

## **U pas te koloto menai e Pol turu kristenira i ROM**

<sup>1</sup> Alia e Pol, a katunun kui tere Iesu Kristo, i ngö sile ii tegomi aposol uu lia na tegomi rarare menai lia U Bulungana u Niga tere Sunahan. <sup>2-3</sup> E Sunahan e ranga hamana noa has i manasa tego hala meraien ra u Bulungana u Niga teka. Nonei e hatei naien turu raranga turu propet i tanen turu Buku u Göagono. E Iesu i poseia tara pala tere King Devit. <sup>4</sup> Na e Sunahan e hatei hasiin e Iesu nonei a Pien a Göagono i tanen ti hatakei pouts menaien tara tou mate tara nitagala pan i tanen. <sup>5</sup> E Iesu Kristo e hala railam a nitagala tego aposol uu lam i tanen, ba lam te hatei namen turu hun katuun hoboto tegi hamana uaien i tanen, bate hengo hanige ren. <sup>6</sup> Na u raranga teka e la has uana i tamilimiou, u katuun te ngö sil rai e Sunahan tego hun katuun uaiam limiou tere Kristo.

<sup>7</sup> Alia te koloto uagu i tamilimiou hoboto u katuun te ngil koru raiena e Sunahan te ka mia tara taun i Rom. E Sunahan e ngö sil railimiou tego katuun uaiam limiou i tanen pepeisa.

Ne Sunahan e Tamarara na e Iesu Kristo a Tsunono, e tatei taatagi rariou limiou na e tatei hala has rari limiou a masalohana.

### *E Pol e haniga uu tere Sunahan*

<sup>8</sup> Alia e hatei mam ragou limiou alia e haniga uagu tere Sunahan, te singo uagu lia i tanen tara solona e Iesu Kristo. Alia e hakats ragou limiou

bate haniga uagu tere Sunahan, taraha u katuun hoboto e hengo ner te hamana uami limiou. <sup>9</sup> A peisar hoboto e tagala silena a toukui tere Sunahan, balia te ranga hatei lanegu u Bulungana u Niga tara Pien i tanen. Ne Sunahan e atei silena te roron singo sil bera gilia limiou, tara mamana pöata te singo gia lia. <sup>10</sup> Alia e singo silegu tere Sunahan tego sabe menaien ta maroro i tar, balia te la uagou i tamilimiu. <sup>11</sup> Taraha, alia e ngil koruegu tego tara merai limiou bate hala ragi limiou a ka a niga turu Namnamei u Göagono, bate hatagalena u nihamana i tamilimiu. <sup>12</sup> U raranga i tar e mar mouna uana teka: alia e ngilegu aragi taguhu mei a tai u nihamana te kamerara.

<sup>13</sup> A matsi hahatoulana alia e hatei ragou limiou, tara para a pöata alia u ngil korui tegona tara merai limiou, kaba a nilala i tar ema mala manai. Alia e ngilegu u katuun i gusumilimiu egi hamani u raranga i tar, ti mar hamana has uu a palair u katuun tema Jiu ri. <sup>14</sup> E Iesu e hale mei lia u raranga u tagala tegona ranga hatei lanaia lia tara tei Grik na turu katuun tema Grik has ri na turu katuun te kamer a niatei na turu katuun has u tutu. <sup>15</sup> Na lia e ngilin habulungana koru has nagia u Bulungana u Niga i tamilimiu u katuun te ka mia i Rom.

### *U Bulungana u Niga e ka mena a nitagala*

<sup>16</sup> Alia e haröto koru megu u Bulungana u Niga. E Sunahan e haleien a nitagala tego lu pouts merien u katuun hoboto te hamane ren, e la mam uana turu Jiu, bate töan la uana turu katuun tema Jiu ri. <sup>17</sup> Taraha, u Bulungana u Niga e haröto nena te markato hamatskö mera nei e Sunahan

u katuun i matanen tara pöata te hamana uaren i tanen, ba nonei te kato hamatskö ranen. Ba ka teka te taguhu ranen ba nori te hamana haniga koru lel ria i tanen. Ti mar koloto has menaien turu Buku u Göagono, “A katuun te matsköna i matana e Sunahan bate hamanana, a katuun teka te töatöa nitöa nou.”

### *U katuun i puta e kato homir*

<sup>18</sup> E Sunahan i Kolö e haröto nena nonei e raharaha rena u katuun hoboto te kato homir, u katuun te hatu kap ner u raranga u mana na man markato a man omi i taren, e Sunahan ena hahuna ranouen. <sup>19</sup> Taraha, e Sunahan e haröto raneien a mamanaka a para i tanen, a manka te antunan atei siler u katuun. <sup>20</sup> A katuun ema antunan tare nei e Sunahan, kaba tara pöata te habuteia e Sunahan a mamanaka te noana i romana, u katuun i atei sil a markato tere Sunahan na nitagala i tanen te ka nitöana. A manka te habuti e Sunahan e haröto halesala nena a ka teka, ba u katuun tema antunan poeieri nori ema atei sileri e Sunahan. E möa. <sup>21</sup> Nori e atei sileren, kaba nori ema hapan hantuna narien tara nikapan i tanen, na nori ema haniga has uari i tanen. Nori e hakats papalar, ba u hakhakats u tutu i taren te kato hakuhil ranen. <sup>22</sup> Nori e poeier, “Alam e ka mem a niatei,” kaba e möa, nori e butun tutu koru len talar. <sup>23</sup> Nori ema hatsunoneri e Sunahan a kapan te ka nitöana. E möa. Nori e hatsunono laser u kesa\* tara ka te tatei matena: a katuun na apena na poum na muki na kökötsi.

---

\* **1:23:** A man got gamogamo.

<sup>24</sup> U katuun i saputu mei a markato a omi be Sunahan e töa rongaronga ranen ba nori e markato uaier timar ngil uaien, ba nori e hiakatokato hohomi naier a peisaren. <sup>25</sup> Taraha, nori e tori tsuga ner a manka a man mana te hatei nena e Sunahan ba nori te hamaner a manka a man gamo. Nori e hatsunono haser a manka te habuti e Sunahan, bate tori tsuga tsipon naier e Sunahan te habuti a mamananaka, nonei koku tegi solo sei nitöa nira! U mana.

<sup>26</sup> Be Sunahan e töa rongaronga ba ranen ba nori e markato uaier timar ngil uaien. A touhaliou i raman a markato tara hitöl bate hiakaka gono poutsur. <sup>27</sup> Na pal tson i markato has uu iesana. Nori i rama hasiin a markato tara hitöl bate hiakaka gono poutsir. A tson e kaka gono pouts has mei a tana tson, ba nori hoboto te luer a nihahuna i peisaren te matsköna tara markato teka.

<sup>28</sup> U katuun ima hakats nai e Sunahan na i raman ka mei a niatei a niga, ba nonei e töa rongaronga ranen tegi ka noahas menaien u hakats u omi na tegi kato homi has menaien a markato a omi. <sup>29</sup> Ba nori e saputu mer a mamana a markato a omi: nori u katuun u gulgulka, na u hihiomu bate tori homi ner a taina katuun bate hiatungur bate hipöilir. Na te gamo uaren bate hakats homir bate tuts sil has raier a palair u katuun. <sup>30</sup> Nori e ranga homi ner a tana katuun bate omier e Sunahan. Na nori ema hapaneri ta katuun, kaba nori e hipusur bate ranga sesei ria i peisaren pouts. Nori e roron hakats ner a man maroro a man tsimus tegi kato homi uaien. Nori e hipus rer u tamaren na u tsinaren. <sup>31</sup> Nori e hakats papala lasir, batema

kukuteri u raranga pouts i taren. Na nori ema ngileri na ema taatagi has nari a tana katuun. <sup>32</sup> E Sunahan e haka hakapi a lo te poeiena, u katuun te markato homi uaier teka e Sunahan ega kato hamate raien. Nori e atei siler a ka teka, kaba nori e kato homi noa hasir, bate taguhu has rer a palai tegi markato has uaieren iesana.

## 2

### *E Sunahan a tsonun onuna a matskö*

<sup>1</sup> Te one mia lö a palair u katuun, ga lö e kato homi hasim. Alimiou e möa tego ranga uaiam. Pöata te pei mia limiou a palair u katuun e omir bate hahatu peisa mia i taren, ga limiou e kato has uamiou iesana. <sup>2</sup> Ara e atei silera e Sunahan e kato hamatsköna te ona mera neien u katuun te katoeier a man markato a man omi. <sup>3</sup> Alimiou e ona ramiou a pala te kato homir, kaba limiou e kato homi has miou. Alimiou e pei lase miou alimiou ena mous bane mou u nihahuna tere Sunahan. E möa. <sup>4</sup> E Sunahan e roron tuatami koruna turu katuun, na ema roron raharaha boroboro nei na ema roron hahuna boroboro has ranei u katuun, taraha nonei e ngilena alimiou go habirits ba naiam a man markato a man omi i torimilimiou. Na limiou goma sigalemi a markato tere Sunahan na egoma hakats papala namien.

<sup>5</sup> Alimiou e hipus koru miou, na limiou ema antunan palisemi u hakats. Na limiou e kato hapan koru lele miou a nihahuna te lue moa limiou tara pöatan hahuna tere Sunahan, tara pöata te haröto nanouen temar raharaha uanen na te ona hamatskö uanen. <sup>6</sup> E Sunahan e hamatana

hapopo has ranoua u katuun tara saha ka ti katoeien. <sup>7</sup> A palair u katuun e roron kato haniga siler tegi hapan meraien e Sunahan bate solosei ranen, na tegi lu menaien a nitöatöa teka nitöana. Ne Sunahan e hala ranouien romana a nitöatöa te ka nitöana. <sup>8</sup> Na palair u katuun e hakats peisa ner a peisaren bate tori tsuga ba ner u raranga u mana bate kukuteier a markato a omi. Na e Sunahan e raharaha ranouen bate hahuna ranen romana. <sup>9</sup> U katuun hoboto te kato homir e lue riou a nitiamana u kamits, u Jiu mam, na u katuun has tema Jiu ri. <sup>10</sup> Kaba e Sunahan e solosei nou a solor u katuun hoboto te kato hanigar bate hapan ranouen bate hala has ranouien a masalohana i toriren, u Jiu mam, na u katuun has tema Jiu ri. <sup>11</sup> E Sunahan ema ngil ranei a palair u katuun puku bate rama raiena a palai. E möa. E Sunahan e mar ona meranei u katuun hoboto iesana.

<sup>12</sup> U katuun tema Jiu ri ema ka puta ria tara Lo tere Mosis. Kaba te kato homi rouen, ba nori te mate riou, noahasina tema la uanei u raranga tara Lo i taren. Kaba u Jiu e ka puta ria tara Lo tere Mosis. Na te kato homi rouen, ba u raranga tara Lo te ona ranouen. <sup>13</sup> U katuun te hengo tuun laser a Lo ema matskö ria i matana e Sunahan. E möa. U katuun lasi te kukuteier a Lo, nori te matskö ria i matana e Sunahan. <sup>14</sup> U katuun tema Jiu ri ema ka meri a Lo tere Mosis. Kaba pöata te kato merien u ngil peisa i taren a manka te ranga nena a Lo, bate here tala nei a lo peisa i taren, noahasina tema ka merien a Lo tere Mosis. <sup>15</sup> Nori e haröto ner a ka te haröto nena a Lo e ka hasna i toriren. Na toriren iogana e haröto has nena te mana uana a ka teka, taraha u hakats i

taren e poeiena a markato i taren e omina tsi a markato i taren e matsköna. <sup>16</sup> A mamanaka teka e butu nou tara pöata temi one noua e Sunahan a man hakats hoboto te mousuna i torir u katuun, temar ranga has uana u Bulungana u Niga te habulungana negulia na e poeiena e Sunahan emi ona sila ranouen tere Iesu Kristo.

### *U Jiu na Lo*

<sup>17</sup> Alimiou u katuun te pei miou alimiou u Jiu. Alimiou e poeimiou a Lo tere Mosis e taguhu ranou limiou, ba limiou te ranga sesei namou te katuun uami limiou tere Sunahan. <sup>18</sup> Alimiou e atei silemiou a saha ka te ngilena e Sunahan, tego katoeiam limiou. Na Lo e hatuts ranei limiou tego haniga mena milimiou a ka te matsköna. <sup>19</sup> Alimiou e peimiou alimiou e haröto namiou a markato tere Sunahan turu katuun u tutu, te here rari u katuun u matakiou te hula la rja turu kuhil. <sup>20</sup> Na limiou e roron hamatskö ramiou u katuun tema hakats hanigari, na limiou e hatuts ramiou u katuun te hakats here rari a galapien. Alimiou e peimiou alimiou e atei silemiou a Lo tere Mosis e ka mena a man niatei hoboto na man raranga a man mana te ngiler u katuun.

<sup>21</sup> Alimiou e hatuts ramiou a palair u katuun, ga ha tsiponi tema hatuts memilimiou a peisamiou? Alimiou e poeimiou a katuun egoma tatei kop ii. Ga limiou e kop has miou? <sup>22</sup> Alimiou e poeimiou a katuun egoma tsikolo ii. Ga limiou e tsikolo hasmiou? Alimiou ema hanige mi u kesa, ga limiou e kop has mia tara man luman lotu i taren? <sup>23</sup> Alimiou e ranga sesei namiou te ka menami a Lo tere Sunahan, kaba pöata te pekoemi limiou a

Lo i tanen, bu katuun te tarar bate ranga homi has ner a solonen. <sup>24</sup> I koloto has naia turu Buku u Göagono, “U katuun tema Jiu ri e ranga hohomi naier a solona e Sunahan, taraha alimiou u Jiu, u katuun i tanen e kato homi has miou.”

<sup>25</sup> Te kukute mia limiou u Jiu a Lo tere Sunahan, bara, ga e niga talana tu hapö mena milimiou a hatöatongo tere Sunahan i pikpikö milimiou. Kaba te pekoe mia limiou a Lo, bara, ga limiou u mastein hapö tala naiam a hatöatongo tere Sunahan. <sup>26</sup> A katuun tema Jiu nei ema hapö nanei a hatöatongo tere Sunahan i pikpikönen. Kaba te hengo hanige nen u raranga tara Lo, be Sunahan te kato here has naneien a katuun te hapö nena a hatöatongo tere Sunahan. <sup>27</sup> Te markato tala uanen teka ba markato turu katuun tema Jiu ri te haröto nanou a markato i tamilimiou u Jiu e omina. Taraha, alimiou e peko noa hasemiou a man Lo, noahasina te ka memia limiou a Lo ti koloto naia turu Buku na hatöatongo has tere Sunahan. Kaba nori e hengo hanigeier a Lo, noahasina tema ka merien a hatöatongo tere Sunahan. <sup>28</sup> A katuun te ka mena u nihamana i torinen nonei a Jiu hamana. Ema ka peisa uanei tara katuun te hapö naia a hatöatongo tere Sunahan i pikpikönen. E möa. <sup>29</sup> A Jiu hamana nonei a katuun te hengo hanigeiena e Sunahan i torinen. Na mar hatöatongo te ngil koruena e Sunahan ema ka neia turu pikpikö. E möa. Kaba a hatöatongo te ngilena e Sunahan nonei u tori te kato hagogosi u Namnamei u Göagono. A mar katuun teka ema ngil ranei u katuun egi hapaneien. E möa. Nonei e ngil lasena e Sunahan tega hapaneien.



### 3

<sup>1</sup> U Jiu e kamer ta ka tema kameri a palair u katuun? E ka mena ta ka ta niga te hapö sileri u katuun a hatöatongo tere Sunahan? <sup>2</sup> Aa, u Jiu e kamer a parpara ka tema kameri a palair u katuun. E Sunahan e haniga mam merai u Jiu tegi lu menaien u raranga i tanen bate tara kap naren. <sup>3</sup> E manana, a palai i taren ima hamanei e Sunahan. Kaba ema antunan hapiou nai e Sunahan a ka te ranga hamana naien ega katoeien. <sup>4</sup> E möa koru! E Sunahan e ron ranga hamana nitöa lasina, noahasina te roron gamo hoboto uer u katuun. Taraha, u Buku u Göagono e mar ranga mena nei e Sunahan teka:

“U raranga i tamölö e haröto nanou alö e matsköm. Te kout narouen lö ba nori te sabie riou u raranga i tamölö e matsköna.”

<sup>5</sup> Kaba te kato homi rara e haröto halesala nena e Sunahan te matsköna, aragi pei aha? (Alia e ranga heregi a katuun tuun.) Ga e niga hasina tegi pei menaira e Sunahan te kato homina te hahuna mera neien ra? <sup>6</sup> E möa koru. Sanena e Sunahan egoma hahuna raira, ba nonei tema antunan ona has ranei u katuun hobotora i puta teka.

<sup>7</sup> Kaba a katuun e tatei poeiena, “Te haröto nena u gamo i tar e Sunahan e ranga hamanana ba u gamo i tar te soloseie nen, gaha tsiponi te pei meneien alia gi hahune iou?” <sup>8</sup> A palair u katuun e mar gamo uar teka bate poeier, “Aragi markato uu teka, ‘Aragi kato homi sil tega butu uu ta ka ta niga.’ ” Nori e ranga homi nariou lia bate poeier nonei a man raranga i tar teka. Kaba e möa. E

Sunahan e hala ranouien a nihahuna te matsköna i taren.

*E möa ta katuun ta matskö*

<sup>9</sup> Na lia e hohou rangata leligu, a nikaka turu Jiu e niga bala nena a nikaka turu katuun tema Jiu ri? E möa koru. U katuun hoboto, na u Jiu na pala tema Jiu ri, nori e ka hoboto mer a markato a omi.

<sup>10</sup> Temar ranga has uana u Buku u Göagono:

“E möa ta töa ta katuun tega matskö, e möa koru.

<sup>11</sup> E möa ta katuun tega atei.

Na e möa ta töa ta katuun tega sake e Sunahan.

<sup>12</sup> A mamana katuun hoboto i laba hakapein a maroro a matskö.

Nori e kato talaser a markato a omi.

E möa koru tegi kato lel menaien ta markato ta niga,

e möa koru lasi.

<sup>13</sup> U ranga i taren e omi here nei a kioun mate te kaho poutseier bate soka koreme homi koruna,

nori e gamo tuneri a tana katuun a penrung ren.

U ranga u omi i taren, te here nei a matuna te ka mena a kökötsi.

<sup>14</sup> A runguren e saputena u ranga u mal, na te omi menarien a tana katuun.

<sup>15</sup> Nori e ma hahanei sil nitöa naier tegina atung hamate meraien a palair u katuun.

<sup>16</sup> Tara mamana han te la uaren, nori e habuter a niomi bate kato hatiamer a torina a tana katuun.

<sup>17</sup> Nori ema atei sileri a markatona tara masalohana.

<sup>18</sup> Nori ema matout ri na ema hatsitsieri e Sunahan.”

<sup>19</sup> Ara e atei silera a mamananaka te ranga nena a Lo tere Mosis e la uana turu katuun te kukuteier a Lo teka. A ka teka e hapiou rena u katuun hoboto te ngilin poeier, “Alia e möa ta markato ta omi.” <sup>20</sup> A katuun te kukutiena a mamananaka te ranga nena a Lo ema matskö neia i matana e Sunahan, taraha a Lo e haröto nena a katuun te kato homina.

*E Sunahan e mar hamatskö mena nei a katuun teka*

<sup>21-22</sup> Kaba e Sunahan e ka mena a maroro te kato hamatskö mera neien u katuun i matanen, na nonei ema maroro uanei tara Lo tere Mosis. E möa. Nonei a marorona tara nihamana tere Iesu. I romana e Sunahan e kato hamatskö rena u katuun hoboto te hamana ria tere Iesu Kristo. A Lo tere Mosis na u raranga turu propet e hatei naier a ka teka. U katuun hoboto e markato uaier iesana i matana e Sunahan. <sup>23</sup> U katuun hoboto i kato homi na ema antuna ria tara mar katuun te ngilena e Sunahan. <sup>24</sup> Na e Sunahan e kato hamatskö has rena u katuun, taraha nonei e taatagi ranen. Na e Iesu e sakahis hakapa pouts raien kaba ema holeri. <sup>25</sup> E Sunahan e hopö kapiin e Iesu tega nolo be pouts meraien u katuun hoboto. Nonei e mate sil tego luba menai e Sunahan a man markato a man omi turu katuun, tegi hamana uaian tere Iesu. E Sunahan e kato mei a ka teka tego haröto menaien te matskö uanen. Taraha, i manasa nonei e tara hahalongolo tuni a man markato a man omi turu katuun. <sup>26</sup> Kaba i romana nonei e haröto nena te matskö uanen na te kato hamatskö has mena neien a katuun te hamana uana tere Iesu.

<sup>27</sup> Ara ema tatei pei lele rei, “Tara muma. Alia a katuun a matskö, taraha alia e kukutiegu a Lo

tere Sunahan.” E möa. Ara e matskö las mera te hamana uarara tere Iesu. Te markato uanen teka bara tema tatei solosei lele rei a peisarara. <sup>28</sup> A katuun e matsköna tere Sunahan turu nihamana i tanen. A katuun ema matskö neia te kukute menaneien a Lo. <sup>29</sup> E Sunahan nonei a Sunahan pepeisa turu Jiu? E moa. Nonei a Sunahan has turu katuun tema Jiu ri. <sup>30</sup> Taraha, a töa puku a Sunahan te kato hamatskö ranou u Jiu na u katuun tema Jiu ri turu nihamana i taren. <sup>31</sup> Ge hana, ara e kato homiera a Lo tere Mosis te kukute mena reira a markatona turu nihamana? E moa koru. U nihamana i tarara te tupa mera neira tara saha ka te ngilena a Lo.

## 4

### *A nihamana tere Abraham*

<sup>1</sup> Gaha tegi tatei ranga naia ra tere Abraham e tuburara? Na saha niatei te ka meien turu nihamana? <sup>2</sup> Sanena e Sunahan te hanigei e Abraham te kato hamatskö menaien a mamanaka, ba nonei te tatei ranga sesei nena a peisanen. Kaba nonei ema kato uai teka. E möa. <sup>3</sup> Taraha, u Buku u Göagono e poeiena, “E Abraham e hamani e Sunahan be Sunahan e ngöe neien a katuun a matskö i matanen.” <sup>4</sup> Hena, a katuun te kuina e holeri a moni. Na hihol i tanen ema here nei a kaan halhala puku. E möa. Nonei e kui sileien. <sup>5</sup> Kaba a katuun tema hakats hapara nanei a toukui a niga na markato a niga i tanen bate hamana tuun na tere Sunahan, be Sunahan te tarena u nihamana i tanen bate töan ngöe neien a katuun a matskö i matanen. Taraha, e Sunahan te tatei kato hamatskö hasena a katuun a omi. <sup>6</sup> E Devit a King e mar ranga has uu teka, a katuun

e tatei sasaalana te ngö mena neien e Sunahan a katuun a matskö i matanen batema hakats nanei a markato a niga i tanen:

<sup>7</sup>“U katuun egi sasaala  
te luba menai e Sunahan a man markato a  
man omi i taren,  
bate solopale nen.

<sup>8</sup>A katuun ega sasaala  
tema kout mena nei e Sunahan a man  
markato a man omi i tanen.”

<sup>9</sup>A nisasaala teka e la las uana turu Jiu, te ka mer a hatöatongo tere Sunahan? E möa. E la has uana turu katuun tema Jiu ri tema ka meri a hatöatongo tere Sunahan. Taraha, alia e ranga hakapa gula e Abraham e hamani e Sunahan be Sunahan e ngöe neien a katuun a matskö. <sup>10</sup>Ga i hangisa te butuia a ka teka? I murina te hapö naien a hatöatongo tere Sunahan i pikpikönen? E möa. E Sunahan e ngö noei e Abraham a katuun a matskö i mamuna te hapö naien a hatöatongo tere Sunahan. <sup>11</sup>E Abraham e hapö hamurimurin a hatöatongo tere Sunahan, bate hatei tala nena e Sunahan e ngöeien a katuun a matskö te hamana uaien, ba nonei e töan hapö nena a hatöatongo tere Sunahan. E Sunahan e kato sile ii a ka teka tegi ngö menai e Abraham e tubur u katuun hoboto te hamaner e Sunahan be Sunahan te ngö raneien u katuun u matskö i matanen, noahasina tema ka merien a hatöatongo tere Sunahan. <sup>12</sup>E Abraham has e tubur u Jiu ti hapön a hatöatongo tere Sunahan bate kukute haser a markatona turu nihamana i tanen, te ka meien i mamuna te hapö naien a hatöatongo tere Sunahan.

*U ranga hamana tere Sunahan e la uana turu katuun hoboto te hamanar*

<sup>13</sup> E Sunahan e halan u raranga hamana i tanen tere Abraham na tara pala i tanen tegi tatei lu menaien a man han hoboto i puta teka. U raranga hamana teka ema butu sila meia tara Lo tere Mosis. E möa. E la silama tara markato turu nihamana te kato hamatskö rana u katuun i matana e Sunahan. <sup>14</sup> Sanena u katuun te kukutier a Lo te luer aha te rangein e Sunahan, ba u nihamana i tarara te la papala tununa bu ranga hamana tere Sunahan tema taguhu tala ranei a pala te hamanar. <sup>15</sup> Taraha, a markato tara Lo te tatei habutena a raharaha tere Sunahan. Kaba tega möa has ia ta Lo, bate möa hasina ta ka tegi peko mei a Lo.

<sup>16</sup> Nonei te hala sila naia e Sunahan u raranga hamana teka i tanen turu katuun te hamanar. A nihitaguhu peisa tere Sunahan te habutu hamane nou u raranga hamana i tanen. E markato uana teka bu ranga hamana i tanen te la uana turu katuun hoboto tere Abraham. E la hoboto uana i tarara u katuun te hamanara, u Jiu na u katuun has tema Jiu ri, tegi mar hamana uu ra temar hamana uu e Abraham. Taraha, e Abraham e here nei e tuburara hoboto u katuun te hamanara. <sup>17</sup> Na temar ranga has uana u Buku u Göagono, “Alia e Sunahan te taguhe goulö ba lö te hatubuna moa tara katuun a parpara.” E Abraham e hamana uu tere Sunahan te hatöatöa poutsena a katuun a mate na te ranga nena a ka tema butu noa nei bate butuna.

<sup>18</sup> E Abraham ema hanöan hamana ii tega butu uu rangan hamana tere Sunahan, noahasina te tara here meien a ka teka ema butu noi, nonei

e hamani a ka egona mar butu noahas uu temar ranga uu e Sunahan. Ba i murinen be Abraham e hatubuna rena u katuun u parpara koru. Temar ranga noahas menai e Sunahan e Abraham, “A pala i tamölö ena parpara koru riou.” <sup>19</sup> E Sunahan e hatei e Abraham ega hatuhani ta pien, tara pöata te sukuukun kameien u 100 u hiningal. Kaba nonei e hamana hatagala korui u raranga tere Sunahan, noahasina te hakats menaien te tsonpan koru uu tuenrei i tanen, na te hakats has menaien a tahol i tanen e Sara ema antunan pose ii ta pien. Nonei e ka noa las mei u nihamana.

<sup>20</sup> Nonei ema hahamana ii bate hula hakats nena u raranga tere Sunahan. E möa. Kaba u nihamana i tanen e butu hatagala koru, ba nonei e soloseiena e Sunahan. <sup>21</sup> Nonei e hamana hatagala koru, na nonei e atei sil e Sunahan e antunan habutena a ka te ranga hamana naien. <sup>22</sup> Nonei koru a ka teka be Sunahan e ngöe nei e Abraham a katuun a matskö. <sup>23</sup> Kaba u raranga te poeiena, “E Sunahan e ngöei e Abraham a katuun a matskö,” u raranga teka ima koloto peisa menai tere Abraham. E möa. <sup>24</sup> I koloto has menai i tarara. E Sunahan e ngö has ranei ra u katuun u matskö te hamana uarara i tanen, nonei te hatakei poutsi e Iesu a Tsunono i tarara tara tou mate. <sup>25</sup> E Iesu e mate sil a man markato a man omi i tarara me takei pouts silena tego kato hamatskö meraien ra i matana e Sunahan.

## 5

### *Ara e matskö tala ria i matana e Sunahan*

<sup>1</sup> A Tsunono i tarara e Iesu Kristo e kato beraira a masalohana tegi ka gono menai ra e Sunahan. Na

ra e matskö tala ria i matana e Sunahan, taraha ara e hamana ria tere Iesu. <sup>2</sup> Na e Sunahan e haniga mera neira te hamana uarara tere Iesu. Ba ra te la hasukusuku uara tere Sunahan bate ka gono meren. Ba ra te sasaala mera te hahaloso mena reira a pöata tena ka gono meroara e Sunahan tara han a niga i tanen. <sup>3</sup> Na ra e tatei sasaala has mera a manka man omi te butuna i tarara. Taraha, e hatagala ranoura na e hatuts has ranei ra tegi hahaloso menaira a pöata a niga. <sup>4</sup> Na ka teka e taguhu ranou ra tegi niga uu ra. Na te haniga renara e Sunahan, ba ra te tagala silera tegi hamana uu ra i tanen bate hahalosera a ka a niga te hopö kap beraien ra. <sup>5</sup> Na ra ema hahaloso pinopino rei, taraha e Sunahan e hala raira u Namnamei u Göagono me hala raneira u ngilngil te kana i torirara.

<sup>6</sup> A pöata tima ka noa meira ta nitagala tegi taguhu meira a peisarara, be Iesu e mate sil ranoura u katuun u omi, terena pöata noahas e Sunahan te hopö kap mamin. <sup>7</sup> Na u mana nitöa, esi nonei ta töa ta katuun te tatei mate silena a tana katuun a niga? E möa. Tsi ta töa ta katuun te tatei ongolona bate mate silena a tana katuun a niga koru. <sup>8</sup> Kaba e Kristo e mate sil raioura tara pöata ti omi noaiara. A ka teka e haröto marei ranei ra e Sunahan e taatagi koru raioura. <sup>9</sup> Ga ha te pei milimiou? E Iesu e kato berai ra a ka teka tara pöata ti omi noaia ra. Na nonei e kato hamatskö has raiara i matana e Sunahan tara tou mate i tanen. Na te kato beraien ra a manka teka, ba ra te tatei atei silera nonei e hatongo ranoua ra tara raharaha tere Sunahan. <sup>10</sup> Ara e hereri u katuun ti paköi e Sunahan, kaba pöata te mateia a Pien Tson



i tanen, ba nonei e kato poutsena a masalohana i tarara gono mei e Sunahan. Na nitöatöa tere Iesu te taguhu ranoura, na te ka haniga sila has riarā. <sup>11</sup> Ba ra te soloseiera e Sunahan bate sasaalā, taraha a Tsunono i tarara e Iesu Kristo te putin tegi ka haniga pouts gono menaira e Sunahan.

### *E Adam na e Kristo*

<sup>12</sup> A markato a omi e la sila ma i puta tara töa katuun, e Adam. Na markato a omi i tanen e habuti a tou mate. Ba tou mate e la hoboto uana tara mamana katuun, taraha u katuun hoboto i kato homi. <sup>13</sup> A Lo ema butu noai tara pöata ti katoeia u katuun a man markato a man omi i puta. Kaba e Sunahan ema hakats sile ii a man markato a man omi i taren, taraha e möa noa ta Lo. <sup>14</sup> Kaba tara pöata noahas tere Adam ba tena noana tara pöata tere Mosis u katuun i mate noa talasi. U katuun has tima hipus nai e Sunahan, temar kato uu e Adam.

E Adam e here ii u haharuei tara tana katuun tega murimurima romana, nonei e Iesu. <sup>15</sup> Kaba a huol a katuun teka ima kato uai iesana. A markato a omi tere Adam ema poponeia tara nitaatagi na ka te hala pukpuku raira e Sunahan. E manana, u katuun u parpara koru i mate silaia turu kato homi tara töa puku a katuun e Adam. Kaba a nihitaguhu tere Sunahan na kaan halhala puku i tanen e pan balana, bate taguhu has rena u katuun u parpara, taraha a töa katuun nonei e Iesu Kristo te taatagi ranou ra. <sup>16</sup> A markato a omi tara töa katuun te habutu a ka a omi. Na ka a omi teka ema popo has neia tara kaan halhala puku tere Sunahan. Taraha, i murina te kato homi ia e Adam a töa puku a pöata, be Sunahan e hopö

kap beneien a nihahuna. Kaba i murina ti kato homi hapara iara, e Sunahan e taatagi noa has raoura me ngö ranei ra u katuun u matskö. <sup>17</sup> A tou mate e pan sila ia turu katuun, te kato homi uu a töa puku a katuun e Adam. Kaba a toukui tara tana katuun e Iesu Kristo te pan bala koruna. U katuun hoboto te luer a nihitaguhu pan tere Sunahan bate hanigeier tega hamatskö meraien e Sunahan, nori ena tsunono riou, taraha, e Iesu Kristo e hala ranoien a nitagalana tara nitöatöa.

<sup>18</sup> Na e mana nitöana. E Adam a töa puku a katuun te kato homi me kalatena a maroro tegi lu menai u katuun hoboto a nihahuna. Kaba nonei a tana katuun e Kristo e kato hamatskö me töan kalatena a maroro tego hamatskö merai e Sunahan u katuun hoboto bate hala raneien a nitöatöa. <sup>19</sup> Turu kato homi tara töa katuun puku te hipusin e Sunahan ba katuun a parpara e kato homina i matana e Sunahan. Kaba a tana katuun e hengo hanigei e Sunahan, ba katuun a parpara e matskö ria i matana e Sunahan.

<sup>20</sup> E Sunahan e hala sile mei a Lo i tanen tegomi haröto meraien u katuun ti markato homi uaien, ba nori e töan kato koru leilir a mamana a markato a omi koru. Kaba a nihitaguhu tere Sunahan e tagala saluhe korueiena a man markato a man omi i taren. <sup>21</sup> I manasa a markato a omi e haka puta raia u katuun tara tou mate. Kaba a nihitaguhu tere Sunahan e antunan kato hamatskö rena u katuun bate hala raneien a nitöatöa te ka nitöana ti lu sila naiara tere Iesu Kristo a Tsunono i tarara.

*Ara i mate gono mei e Kristo me tōatōa gono has meren*

<sup>1</sup> Bora, ga rahi ranga talein aha? Aragi kato homi sil noa hasi tega taguhu lel merai ra e Sunahan bate luba nena a man markato a man omi i tarara? <sup>2</sup> E mōa koru! A markato a omi ema pan lel neia i tarara. Ara e hererari u katuun u mate te ka hatalis ba nera a markato a omi. Na ra ema antunan lū lelnaroi a markato teka. <sup>3</sup> Alimiou ema atei silemi ti baptais iara, ara e ka gono mera e Iesu? Na pōata te mateien e here hasenei ara i mate ba hasiin a markato a omi, <sup>4</sup> na te baptais ria ra e here hasenei ara i mate gono mei e Kristo bate kaho gono has merien. Na tara nitagala tere Tamanen nonei e takei pouts ia tara tou mate i tanen. Na ra has egi takei gono meien bate tataala gono meren tara nitōatōa a tsimus.

<sup>5</sup> Na ti ka gono meien ra tara tou mate i tanen, ara e ka gono has merouen tara tou takei pouts i tanen. <sup>6</sup> Ara e atei silera a markato a omina i tarara na i manasa i hakute gono mei e Kristo tara kuruse, ba ra tema tatei kukute lel narei a markato a omi. <sup>7</sup> Na esi te matena e tapurese ba nena a nitagala tara markato a omi. <sup>8</sup> Na ti mate gono meia ra e Kristo, ba ra te tōatōa gono has meren. <sup>9</sup> Ara e atei silera e Kristo e takei pouts ia tara tou mate na ema antunan mate lel noi. A tou mate e mōa lel ta nitagala tego kato homi lel meien. <sup>10</sup> Nonei e mate a tōa puku a pōata, ba ni-mate e luba nena a nitagalana tara markato a omi. Na nitōatōa i tanen e tōatōa silena e Sunahan. <sup>11</sup> Na e markato has uana iesana i tamilimiou. Alimiou go kato here nami a peisamilimiou a katuun te mate ban a markato a omi na te ka gono mena e

Iesu Kristo bate tōatōa gono has mena e Sunahan.

<sup>12</sup> Alimiou egoma hatasue mumei a markato a omi i peisa milimiou, na egoma kukutiemi u ngilngil u omi turu tuenrei i tamilimiou.

<sup>13</sup> Alimiou egoma tatei rongarongemi a markato a omi bate kana i peisa milimiou. E möa. Alimiou go hala naiam a peisa milimiou tere Sunahan bate katoe miou a man markato te nigana i tanen. Taraha, e here nei alimiou u takei pouts mia tara tou mate bate ka memiou a nitōatōa a tsimus.

<sup>14</sup> Na markato a omi egoma tatei mammam rai limiou. Taraha a markato tara Lo ema tsunono lel ranei limiou. E möa. A nihitaguhu tala tere Sunahan te ka gono meranou limiou.

*Ara e here rari u katunun kui tara markato a niga*

<sup>15</sup> U mana koru. Ara ema ka hamanasa talareia tara Lo, ara e ka talaria tara nihitaguhu tere Sunahan, ge hana, e nigana tegi kato meira a markato a omi? E möa koru lasi tegi tatei markato uu ra teka.

<sup>16</sup> Alimiou go atei sil haseiam, te hengo mena milimiou a tōa katuun, ba limiou te kui pinopino tuun moa i tanen. Na te kukute mia limiou a markato a omi, ba nonei te piata mera noi limiou tara tou mate. Kaba te hengoe mia limiou e Sunahan bate kukuteimen, a nikaka i tamilimiou e matskö nitōana i matanen.

<sup>17</sup> Na limiou go haniga uaiam tere Sunahan! Taraha, i mam nen alimiou i katuun papala mia tara markato a omi. Kaba i romana alimiou e kukute miou na e hengo hanige miou u raranga u mana ti hatuts rai limiou.

<sup>18</sup> Alimiou i hapolasa ba tala rai a man markato a man omi, bate kukutie miou a man markato a

man niga. <sup>19</sup> Alia e katoe gula u raranga u gigaha te atei sile milimiou. I manasa alimiou u rongaronge mia a peisa miou tara markato a omi. Kaba i romana alimiou go hala neiam a peisa milimiou tego kato haniga nitöa uaien bate katoe miou a markato a gogoso. Bate butun göagono has mia i matana e Sunahan.

<sup>20</sup> Pöata tu kukute noeia limiou a man markato a man omi, alimiou ima hakats silemi a man markato a man matskö. <sup>21</sup> Kaba a markato tu katoeiam limiou i manasa ema taguhu rai limiou, boka? Alimiou e matsingolo memen. Nonei a markato te las mera nei u katuun tara tou mate. <sup>22</sup> Kaba i romana alimiou e hapolasa ba namiou a man markato a man omi, bate kui hatagala muma tere Sunahan. Na markato teka e habutena a markato a göagono tere Sunahan i tamilimiou, ba nonei te hala ranoui limiou a nitöatöa te ka nitöana. <sup>23</sup> Tara markato a omi a hihol i tanen a tou mate. Kaba e Sunahan e hala sila nena a nitöatöa te ka nitöana tere Iesu Kristo a Tsunono i tarara.

## 7

### *U haharueina tara hitöl*

<sup>1</sup> A matsi hahatoulana i tar, alia e koloto uagu i tamilimiou te atei silemiou a lo. Alimiou e atei miou, alimiou e ka puku las mia tara lo tara pöata te töatöa mia limiou. Kaba tara pöatan mate e möa. <sup>2</sup> Hena, te hitöl na tahol, a lo te kits takono ranen ba nori te ka hereri u mun tahol. Kaba tara pöata te matena a tson i tanen, ga e möa len has ta lo tega kits kap naien tsi tega pilekap naien. <sup>3</sup> Na te töatöa noana a tson ba tahol i tanen tena hitöl lel mena a tabina tson, nonei e kato talena a markato a omi.

Kaba tega mateia a tson i tanen, ba nonei tena hitöl lenina, e niga talana nonei ema kato homi nei.

<sup>4</sup> Na te markato has uanen i tamilimiou, a matsi hahatoulana i tar. E here nei alimiou i hitöl mam mia tara Lo tere Mosis me mate ba namen. Alimiou u mate sileiam tego katuun uaiam limiou tere Kristo, nonei a ka te hatakei pouts sileien e Sunahan tara tou mate. Bara te katoera a man markato a man niga te ngilena e Sunahan.

<sup>5</sup> Taraha, nonei tara pöata ti katoeiara a markatona turu ngilngilina i puta te hatakei a Lo tere Mosis, me hatakeiena u ngilngil u omi i tarara, me habutena a markatona tara tou mate. <sup>6</sup> Kaba i romana ara e hanöa ba nera a Lo, nonei te kits kap raioura. A Lo ti koloto naia turu buku i manasa. Kaba i romana ara e hatakui talera a markato a tsimus, te hala ranera u Namnamei tere Sunahan.

### *A Lo na markato a omi*

<sup>7</sup> Aha tegi pei ra, a Lo tere Mosis e omina? E möa koru! A Lo tere Mosis ema markato a omi nei. Alia sanena ema atei silegi a markato a omi na tego ngil menai lia a manka tara taina katuun, tegoma pei menai a Lo tere Mosis alia goma mamangil nai a ka tara taina katuun. <sup>8</sup> A Lo tere Mosis e mar ranga uu teka ba markato a omi e sabiena a maroro tego hatakei menaien u mamana u ngilngil u omi i peisar, a markato teka e takui silaia tara Lo. Kaba tego möa uu ta Lo, ba markato a omi tema ka menei ta nitagala tega las menaien lia tara markato a omi. <sup>9</sup> I mam nen alia uma atei sile ii temar mouna uu a Lo. Kaba i murinen alia u atei sileien, ba markato a omi e takeina i peisar ba lia e heregi a katuun a mate i matana e Sunahan. <sup>10</sup> A Lo tere Mosis i hala sile mei tego töatöa u lia. Kaba

nonei noa lahas a Lo te kato here tsipon nai lia a katuun a mate. <sup>11</sup> Taraha, a markato a omi e sabie a maroro tego gamo menaien lia. Na tara Lo a markato teka e kato here na nei lia a katuun a mate.

<sup>12</sup> Na limiou go atei iam, a Lo e göagonona na e matsköna na e niga koruna. E möa koru ta töa ta makum i tanen tego omi. <sup>13</sup> Kaba, ime koru te markato uanen? A Lo a niga koru te habuti a tou mate i tar? E moa koru! A markato a omi te kato here nai lia a katuun a mate, te kui sila uen tara Lo a niga, bate kato silena tegi atei sil menaira aha nonei koru a markato a omi. Te markato uanen teka ba Lo tere Sunahan te haröto nena te omi uana a markato a omi.

*U huol u mar ngil tara katuun*

<sup>14</sup> Ara e atei silera a Lo teka e lama tere Sunahan. Kaba lia e ka noahas megu a markato a omina i manasa te pilekap nanou lia, ba lia tema kukuteiegi a Lo a niga tere Sunahan. <sup>15</sup> Alia ema atei sil koruegi a saha ka te kato silegi lia a manka man omi. Ba lia tema katoegi a manka a man niga te ngilin kato negu lia. <sup>16</sup> Kaba te atei sile gia lia te kato menagi lia a man markato a man omi, ga, e hatei hase nelia a Lo tere Sunahan e matsköna na e nigana. <sup>17</sup> Na ema lia talanei te katoegu a manka a man omi teka. Nonei a markato a omi te kana i peisar te katoe nen. <sup>18</sup> Na lia e atei silegu e möa ta ka ta niga tega kaia i peisar. Alia e ranga negu a man markato a man omina i puta i tar. E manana, alia e ngilin katoegu a man markato a man niga, kaba lia u möa ta nitagala tego kato meien. <sup>19</sup> Alia ema katoegi a ka a niga te ngilin katoe gulia. E möa. Alia e katoegu a ka a omi tema ngile gilia.

<sup>20</sup> Na te katoe gilia a ka tema ngile gilia, ba ka teka e haröto nena ema lia peisa nei te katoe gen. E möa. Nonei a markato a omi te kana i peisar te katoe nen.

<sup>21</sup> Na ka te sabeiegu lia te kuina i peisar e markato uana teka: pöata te katsin katoe gia lia a markato a niga, ba markato a omi te butu kapina.

<sup>22</sup> Iahana a torir iogana alia e ngil koruegu a Lo tere Sunahan. <sup>23</sup> Kaba a tana lo e ka hasna i peisar te roron hiatatung gono mena u hakhakats u niga i tar bate kato here nanei lia a karabus tara markato a omi te kana i peisar. <sup>24</sup> Alia e taatagi koru negu a peisar. Esi te taguhe nou lia ba lia te laba negu a markato a omi te ka uana tara tou mate? <sup>25</sup> Alia e haniga uagu tere Sunahan, tara pien i tanen e Iesu Kristo a Tsunono i tarara te taguhe noulia.

Ba lö te tare men turu hakhakats i tar alia e ngilin kukute korunegu a Lo tere Sunahan, kaba a peisar e tagala sil noa hasena a markato a omi.

## 8

### *A nitöatöa turu Namnamei tere Sunahan*

<sup>1</sup> Ara u katuun te kagono mera e Iesu Kristo ema antunan lu narei tu nihahuna. <sup>2</sup> Taraha, a lo turu Namnamei tere Sunahan, te hala ranei ra a nitöatöa tere Iesu Kristo, e purese hakapa raioura. Ara i here ii u katuun ti kitsir na ti roron kaia tara lo tara markato a omi na tara tou mate. Kaba e möa lel tala. <sup>3</sup> E Sunahan e kato a töa ka a niga koru, na Lo tere Mosis ema antunan katoe ii a ka a niga teka, taraha u ngilngilina i puta ema antunan kukute ii a Lo teka. Be Sunahan e hala nenama a Pien Tson i tanen peisa memi lueiena



u tuenrei te markato uu turu tuenrei i tarara me mate silena a markato a omi. Ne Sunahan e luban a nitagala tara markato a omi te kana turu tuenrei i tarara. <sup>4</sup> E Sunahan e kato mei a ka teka tegi matskö koru uu ra tara Lo. Taraha, u ngilngilina i puta ema hakui lel ranei ra. E möa. U Namnamei tere Sunahan te hakui tala ranou ra.

<sup>5-6</sup> Na u ngilngilina i puta e hatakuieiena u hakhakats tara katuun te kukute hasena u ngilngilina i puta. A ka teka nonei a maroro tara tou mate. Kaba u Namnamei tere Sunahan e hatakuui hasena u hakats tara katuun te kukutiena u ngilngil tere Sunahan. A markato teka nonei a maroro tara nitöatöa na tara masalohana. <sup>7</sup> Tara pöata te hatakuieiena u ngilngilina i puta u hakats tara katuun, ba katuun teka te omiena e Sunahan. Nonei e raman hengo nena e Sunahan. Na nonei ema antunan kato has nanei a Lo tere Sunahan. <sup>8</sup> A katuun te kukute lasena u ngilngilina i puta ema antunan hatakuui has nanei u ngilngil tere Sunahan.

<sup>9</sup> Kaba u ngilngilina i puta ema hakui lel ranei limiou. U Namnamei tala tere Sunahan te hakui ranou limiou. Na te ka na u Namnamei tere Sunahan i tori milimiou, nonei u Namnamei teka te mammam ranou limiou. Ba esi tema ka menei u Namnamei tere Kristo, nonei ema katuun uanei i tanen. <sup>10</sup> U tuenrei i tamilimiou e mate nou romana, taraha a markato a omi e kato homieien. Kaba te kana e Kristo i tamilimiou, ba namnamei milimiou te ka mena a nitöatöa tere Sunahan, taraha e Sunahan e kato hamatskö raia limiou i matanen. <sup>11</sup> E Sunahan e hatakei poutsi e Iesu Kristo tara tou mate i tanen. Na te kana u Namnamei tere Sunahan i tamilimiou, nonei e kato

hatöatöa pouts hase nou a tuenrei milimiou te matena.

<sup>12</sup> Na matsi hatoulana, u ngilngilina i puta ema tatei tagala sile nei tegi kukute lel menai ra a markatona i puta. E möa koru. Ara ema antunan kukute len narei u ngilngilina i puta. <sup>13</sup> Na te kukutie moa limiou u ngilngilina i puta ba limiou te mate mou. Kaba te taguhu ranoua limiou u Namnamei, ba limiou te kato hamatiemou a markato a omi turu ngilngilina i puta, ba limiou te töatöa mou. <sup>14</sup> U katuun hoboto te tataala gono meier u Namnamei tere Sunahan nori a galapien tere Sunahan. <sup>15</sup> U Namnamei te hala rai limiou e Sunahan, ema kato ranei limiou u katunun kukui puku ba limiou te matout miou. E möa. Nonei u Namnamei te kato ranou limiou ba limiou te galapien uamiou tere Sunahan. Ba limiou temar ngö tala memien teka, “O Tamar, o Tamar.” <sup>16</sup> Nonei noahas u Namnamei tere Sunahan te hateiena u namnamei i tarara bara te galapien uara tere Sunahan. <sup>17</sup> Na te pien uarara i tanen, ba ra te lue rou a manka man niga i tanen, te markato uana a pien te luen a manka tere tamanen. Na e Sunahan e hala ranoira a manka te hala haseien e Kristo. Kaba tena lu gono merouen ra a manka man niga i tanen, aragi lu hasi a mar nikamits te lueien.

### *A manka man nigana i murimuri*

<sup>18</sup> Alia e poeiegu u nikamits te söate rara i romana e tetenei bala nena a manka a man niga na man kapan tena haröto ranoira e Sunahan. <sup>19</sup> A mamanaka hoboto te kui e Sunahan e hahanei sil nitöa nena a pöata te haröto nanoua e Sunahan te galapien uara ra i tanen. <sup>20</sup> Taraha, a mamanaka

te kui e Sunahan e ka uana tara tou mate. A tou mate ema butuia turu ngil i taren. E möa. E butuia turu ngil tere Sunahan. Kaba e Sunahan e hopö kapiin a pöata te kapana romana a markatona tara tou mate. <sup>21</sup> A mamananaka te kui e Sunahan ena hakapan töa naria romana tara tou mate na mamananaka a omi, te markato has uaier romana a galapien tere Sunahan. <sup>22</sup> Ara e atei silera a mamananaka te katoi e Sunahan te taniama a pöata bate la noahasina i romana i sagoho hoboto lasi a kamits te here nei a tahol te katsin posana.

<sup>23</sup> Ema nori peisari. Ara has, te ka mera u Namnamei tere Sunahan a tantania tara mamananaka a niga tena lue riou romana. Ara e har hasira bate hahalosera a pöata tena lu ranoua ra e Sunahan, ba ra te galapien hoboto uarou i tanen, na tuenreirara na u namnamei has i tarara. <sup>24</sup> E Sunahan e lu pouts raioura ti hamana uu ra i tanen. Na te tare rara a ka te hamana sile rara, ba ra tema hamana sil lele reien. Taraha, a katuun ema hamana sil lele nei a ka te ka menen. <sup>25</sup> Kaba te hamana sile rara a ka tema tara noe rira, ba ra te hahaloso haniga nitöara batema tatei sökana rei.

<sup>26</sup> Ba u Namnamei tere Sunahan te taguhu has ranou ra tara pöata tema tagala reiara. Taraha, ara ema atei sile rei ime tegi mar singo hamatskö uu ra tere Sunahan tsi aha tegi singo sili ra, kaba u Namnamei te ataina. Nonei e singo hataatagi bera noura tere Sunahan, na nonei e ranga uana tema antunan mar ranga uanei a katuun. <sup>27</sup> Be Sunahan, te atei silena a ka te kana i torina katuun, e atei sil hasena u hakats turu Namnamei, taraha u Namnamei e kukutiena u ngil tere Sunahan tara pöata te singo bera nen u katuun tere Sunahan.

<sup>28</sup> Na ra e ateira, a mamanaka hoboto e kui haniga silena u katuun te ngiler e Sunahan, u katuun te ngö sil rai e Sunahan tegi kukute menaien u ngilngil i tanen. <sup>29</sup> E Sunahan e atei sil mamir eresi te katuun uariou romana i tanen na nonei e hopö kap mam raien tegi here menaien a Pien Tson i tanen, ba Pien Tson i tanen te here nei a pien a hamua te ka mena u toulanen u parpara te kute ruma i tanen. <sup>30</sup> Nonei e hopö kap mam raien me ngö has ranen. E ngö raien me kato hamatskö has ranen i matanen noa has. E kato hamatskö raien me hala sei hasena a soloren.

*E Iesu Kristo e haröto nena u ngil pan tere Sunahan*

<sup>31</sup> Ime tegi mar ranga sil menai ra a mamanaka teka? Te ka gono mere nara e Sunahan, gesi te ranga hasoala nama romana i tarara? <sup>32</sup> Nonei ema peits hasnai a Pien Tson i tanen, kaba nonei e hala sile meien i puta tegomi mate sil meraien ra hoboto. Te katoe men a ka teka, ba nonei te hala has ranoui ra a mamanaka. <sup>33</sup> E Sunahan e hopökap mam raioura u katuun i tanen. Gesi te kout ranouara i tanen? E möa tala. Taraha, e Sunahan noa has te ngö ranoira u katuun u hamatskö i matanen. <sup>34</sup> Esi te tatei ranga nanou tegi lu menai ra u nihahuna? E möa tala! Taraha, e Iesu Kristo noa has te mate sil raioura. Ba nonei e takei pouts na tara tou mate i tanen, ba nonei ena kana tara pal matou tere Sunahan me singo hataatagi bera noura tere Sunahan. <sup>35</sup> Esi te tatei luba ranoira u ngilngil tere Kristo? A nomi tsi u tori tiama? E möa. Tara pöata te kato homi ria u katuun i tarara te hamana uara ra tere Iesu, ba ka teka e pei hasena nonei ema taatagi lel ranei ra? E

möa. Tara pöata te butuna a bes i tarara tsi te kaka puku ria ra na te butuna a pöata a omi i tarara tsi a pula, ba manka teka te pei hasena e Kristo ema taatagi lel ranei ra? E möa has. <sup>36</sup> Ti mar koloto menaien turu Buku u Göagono:

“Alam e ka heremi u katuun i tamölö, nonei te katsin atung hamate nitöa merari lam u katuun

Nori e kato here rarilam u sipsip te kato hamate raier.”

<sup>37</sup> Kaba e noahasina. E Kristo e hala ranei ra a nitagala tegi la sei koku uu ra tara mamananaka hoboto teka, taraha nonei e taatagi koku ranou ra. <sup>38-39</sup> Alia e hamana koruegu e möa koku ta ka tega hatongo kap raiou ra be Sunahan tema taatagi lel ranoui ra: a tou mate tsi a nitöatöa, na angelo na nitagala i kolö na i puta, na mankana i romana na mankana i murimuri, na mankana iasa na mankana i puta. E möa koku ta ka tega tatei luba reia ra turu ngilngil pan tere Sunahan. Na e Iesu Kristo a Tsunono i tarara e haröto ranei ra u ngilngil pan teka tere Sunahan.

## 9

### *E Sunahan na u katuun te hopö kap raian*

<sup>1-3</sup> Alia e ranga hamana negu a nimana tere Kristo, alia ema gamogi. U Namnamei u Göagono te kato halesalena u hakats i tar, na lia e atei gia i torir u raranga teka e manana. A manana pöata a torir e roron taatagi koruna bate tiamana te hakats hapara sil mera gilia u katuun i tar. Alia e tatei ngil noa hasegu tego korupakö menai e Sunahan alia bate luba nanei lia e Kristo,

ba u Jiu te lueier a makum i tar, tega antunan lu pouts meraien e Sunahan tara maroro teka. Nonei temar ngil hapopo mera gien lia. <sup>4</sup> Nori u katunura i Israel, u Jiu, a hun katuun te hopö kapiin e Sunahan. E Sunahan e hahahu beraien u katuun i tanen, bate haröto nena a nikapan i tanen. Nonei e kato gono meraien a man rangan kits bate hala raneien a Lo i tanen. Na nonei e haröto raien tegi mar hatsunono menaien, bate hala raneien u raranga u mana i tanen. <sup>5</sup> U katuun pan tere Sunahan i kaia i gusura u tuburen. Na e Kristo has e butun katuun ia turu Jiu, e Kristo te pan talana tara mamanaka. E Sunahan e tatei kato hasasaale nen tara mamana pöata. U mana.

<sup>6</sup> Kaba lia ema poegi u raranga u mana tere Sunahan e la papala. E moa. Taraha, a palair u katunura i Israel ema katuun hamana hoboto uari i Israel. <sup>7</sup> Na ra ema tatei pei hase rei, “U katuun hoboto ti tuhanama tere Abraham nori u hatutubunei hamana i tanen.” E möa. Taraha, e Sunahan e rangaia tere Abraham i manasa me poeiena, “E Aisak a pien i tamölö, na hun katuun tena hatuhane nouen, nori a hun katuun hamana i tamölö.” <sup>8</sup> Alia e mar ranga uagu teka: a galapien tere Sunahan ema katuun peisa uari ti tuhanaia tere Abraham. E möa. A galapien hamana tere Sunahan nori te hamana ria turu raranga u mana tere Sunahan. <sup>9</sup> Taraha, e Sunahan e ranga hamana uu tere Abraham me poeiena, “A pöata te hake gula lia, tena la pouts guma lia romana, ba tahol i tamölö e Sara te ka menou a pien tson.”

<sup>10</sup> Na tana ka has temar butu uu teka. E Robeka e pikeia u puna tara töa tson, e Aisak a tson i tanen,

nonei e tuburara. <sup>11-12</sup> Na e Sunahan e ngilin hopö kap sile ii a töa pien tson tego kato menaien u ngilngil tere Sunahan, ba nonei e poeiena tere Robeka, “A pien a hamua e kui benou a hahuoluna a pien.” E Sunahan e mar ranga mam noa uu teka ba galapien tema posa noa rari, na tima kato haseien a ka niga na ka omi. Nonei e hopö kap merai a galapien u ngil peisa i tanen. E ma hopö kap meraien a markato i taren. <sup>13</sup> Ti mar koloto has menaien turu Buku u Göagono, “Alia e ngilegu e Jekop, kaba lia ema ngilegi e Iso.”

<sup>14</sup> Gara gi mar ranga uu i me, e Sunahan ema matskö nei? E möa koru. <sup>15</sup> Taraha, e Sunahan e mar ranga has uu teka tere Mosis,

“Turu ngilngil peisa noahas i tar  
ba lia te taatagi regu u katuun.”

<sup>16</sup> E Sunahan ema hopö kap mera nei u katuun u ngilngil i taren na tara markato i taren. Nonei e hopö kap meranei u katuun a nihitaguhu peisa i tanen. <sup>17</sup> Na turu Buku u Göagono e Sunahan e rangaia tere King Pero me poeiena, “Alia u ha king sile ii lö tego haröto menai lia a nitagala i tar i matamölö, na tegi solosei menai a solor turu han hoboto i puta” <sup>18</sup> Hena, e markato uana teka, e Sunahan e taatagi sila rena u katuun na e kato hahhipus sila ranen tere nu ngil noahas ien.

### *A raharaha na nihitaguhu tere Sunahan*

<sup>19</sup> Bora alö e tatei mar ranga uam teka, “Te markato uanen teka, e hana be Sunahan te poeiena ara ema niga merei a man markato a man omi te katoe rara? Esi te antunan hapiou nena a ka te ngilena e Sunahan?” <sup>20</sup> E moa, alö a katuun

tuun. Alö ema antunan mar ranga homi kopis uami tere Sunahan teka. A tabeli ema tatei mar ranga uanei teka tara katuun te kui nen, “Taraha koru balö temar kui menami lia teka?” <sup>21</sup> A katuun te kukuiena a tabeli e tatei kuie nen turu ngilngil peisa i tanen. Te ngil nen ba nonei te tatei kuiena a huol a mar tabeli tara töa makumun tsiktsiki: a töa a hihol i tanen e la seina na tabi a hihol i tanen e la putana.

<sup>22-23</sup> Na e Sunahan e markato has uana iesana. A palair u katuun te kato homir, e hereri a tabeli a hihol i tanen te la putana. Ne Sunahan e ngilin hatara has nena a raharaha i tanen na nitagala i tanen. Kaba nonei e roron hahaloso haniga koruna tegi habirits pouts uaien i tanen, na nonei ema tatei sökana nei. E Sunahan e kato menei a ka teka tega taguhu meraien ra. Nonei e ngilin taatagi ranou ra bate hatei ranei ra a nikapan i tanen te kato hahaloso mam beraien ra. <sup>24</sup> Na ra noa has u katuun te ngö ramen turu Jiu na turu katuun tema Jiu ri. <sup>25</sup> Turu Buku tere propet Hosea e Sunahan e mar ranga uu teka:

“U katuun tema katuun uari i tar, alia e ngö ragoien, ‘U katuun i tar.’

Na hun katuun tima taatagi railia, alia e ngö ragouien, ‘A matsomi i tar!’

<sup>26</sup> Tara han ti hatei mam raien,  
‘Alimiou ema katuun uami i tar,’  
e Sunahan te töatöa nitöana ena ngö ranouien  
a galapien i tanen.”

<sup>27</sup> Na e Aisaia a propet e ranga has ia tara tei Israel me poeiena:

“U katunura i Israel e para koru hereri u kotolana,



kaba a Tsunono e lupouts ranou a tsi topisa koru tara katuun.

<sup>28</sup> A Tsunono ema hahaloso noi romana. Nonei e kits boroboro tune nou u rangan hahuna i tanen tara han i puta.”

<sup>29</sup> Na e Aisaia e mar ranga has uu teka: “Sanena a Tsunono, te ka mena a mamana Nita-gala, tema taatagi sil raira bate haniga nena tegi töatöa uu a palai, ara hoboto sanena i mate here rai u katunura i Sodom na i Gomora.”

### *Israel na u Bulungana u Niga*

<sup>30</sup> Bora ime tegi mar ranga uu ra? U katuun tima Jiu ii na tima torohanan kato hamatskö ia i matana e Sunahan, kaba turu nihamana i taren be Sunahan e ngö raneien u katuun u matskö i tanen. <sup>31</sup> Na u katunura i Israel ti kukute a Lo bate katoeier a man toukui tara Lo, kaba e möa tego mala butu hamatskö uaien i matana e Sunahan. <sup>32</sup> Ga ha tima hamatskö naiien? Taraha, nori ima katoeien tara maroro turu nihamana. E möa. Nori i kukute lasi a Lo bate poeier egi nigaia i matana e Sunahan. Bate pal ner e Kristo te here nei a hatu te tutu nena a katuun i maroro. <sup>33</sup> Ti mar koloto has menaien turu Buku u Göagono:

“Tara. Alia e hake gou a hatu i Saion, a hatu te tutu ranoua u katuun. Ba u katuun te hamana ria romana i tanen tema tatei hamatsingolo raroien.”

## 10

<sup>1</sup> A matsi hahatoulana, a torir e ngil hatagala koru rena u Jiu, balia e singo uagu tere Sunahan tegi habirits menai u katuun i tar u hakats i taren

be Sunahan te lu pouts ranen. <sup>2</sup> Alia e atei silegu, nori e tagala sil koruer e Sunahan, kaba nori e peko ba ner a niatei hamana i tanen. <sup>3</sup> Nori ema atei sileri temar hamatskö sila mera nei e Sunahan u katuun i matanen, ba nori tema kukutier i maroro i tanen. Nori e torohanan kuteier a maroro peisa i taren. <sup>4</sup> Kaba e Kristo e hakapa a markato teka tara Lo. Na i romana u katuun hoboto te hamanar, nori te butun matskö ria i matana e Sunahan.

*E Sunahan e ngilin lu pouts rena u katuun hoboto*

<sup>5</sup> I manasa e Mosis e mar koloto uu teka turu katuun ti ngilin butu hamatsköia i matana e Sunahan tara Lo:

“A katuun te katoena a mamananaka hoboto te ranga uana a man Lo, nonei te lue nou a nitöatöa.”

<sup>6-7</sup> Kaba a markato a matskö te la nama tara nihamana e poeiena, “Alimiou goma poeiem i torimilimiou, ‘Esi te la nou i Kolö, tsi esi te la nou tara han i puta iogana nitöa?’ ” U raranga teka ti kolotein i manasa e mar mouna uana teka: ara gima lu pouts mena mei e Kristo i Kolö, tsi ara gima lu pouts has mena meien tara han turu mate. E möa! <sup>8</sup> U Buku u Göagono e hatei ranei ra a ka teka: “U raranga tere Sunahan e ka hasukusuku koruna i tamilimiou. Alimiou e tatei ranga namen i rungu milimiou na e tatei hamana hase men i torimilimiou.” Na u raranga teka nonei u rangana tara nihamana te roron hatei nemulam. <sup>9</sup> E kato uana teka: te ranga hatei mia limiou i rungu milimiou te Tsunono uana e Iesu, na te hamanena a torimilimiou e Sunahan e hatakei

pouts e Iesu tara tou mate, be Sunahan te lu pouts ranou limiou. <sup>10</sup> Taraha, te hamana mia limiou i torimilimiou, be Sunahan te kato hamatskö rena limiou i matanen. Te ranga hatei namia limiou a ka te hamana uami limiou, be Sunahan te lu pouts ranou limiou.

<sup>11</sup> U Buku u Göagono e poeiena, “A katuun te hamana uana i tanen ema antunan hamatsingole roi.” <sup>12</sup> Na ka teka e lauana turu katuun hoboto, u Jiu na u katuun tema Jiu ri. E Sunahan ema lu kaakata ranei u katuun. E möa. Nonei a Tsunono tara mamana mar katuun, na nonei e tangana nena a manka man niga i tanen turu katuun hoboto te singo uaier i tanen. <sup>13</sup> I koloto has naia turu Buku u Göagono, “A Tsunono e lu pouts ranou u katuun hoboto te singo uaier i tanen, ba nonei te Tsunono noa i taren.”

<sup>14-15</sup> Kaba ime temar singo uamölö tara ka tema hamane milö? Na nori ema antunan hamane rien, taraha nori ima hengo noa naien. Na nori ema antunan hengo narien, taraha e möa ta katuun tega hatei raien u ranga. Kaba tega hala mam raien e Sunahan u katuun ba nori te hatei laner u ranga i tanen, ba u katuun te antunan hengo naren bate hamanar bate töan singo uaier i tanen. Ti mar koloto has menaien turu Buku u Göagono:

“Ara e sasaala koru mera te tara mera rira u katuun te la merima u Bulungana u Niga!”

<sup>16</sup> Kaba u katuun hoboto ema hanigeri u Bulungana u Niga. Taraha e Aisaia a propet i manasa e pei hasi, “O Tsunono, e möa ta katuun ta para tega hamani u ranga i tarara.” <sup>17</sup> U nihamana e la nama tara ka te hengoe rara, na ka te hengoe

rara nonei u raranga tere Kristo. Ara e hengoera u ranga, bara te tōan hamanara.

<sup>18</sup> Na lia e rangata ragou limiou: a tei Israel ima hengo nai u ranga teka? E möa. Nori i hengo hakapa. Te pei hasena u Buku u Göagono:

“U raranga tere Sunahan e la kalakala hoboto uu turu han i puta.”

<sup>19</sup> Na lia e rangata leligu, nori a tei Israel ima atei ii? E möa. Nori i atei has, kaba nori ima kukute ii u raranga. E Mosis e kolotein a ka teka te ranga meraia e Sunahan u Jiu:

“Alia e kato ragou limiou ba limiou te hiomi moua turu katuun tema Jiu ri, u katuun te ngö rami limiou u katuun u tutu,

ba limiou te tōan raharaha koru mou.”

<sup>20</sup> Na e Aisaia a propet ema matout has ii me hatei nena u raranga tere Sunahan teka:

“Alia u harötein a peisar turu katuun tema Jiu ri tima rangata nai lia.

Na u katuun tima sake ii lia nori u katuun tina sabeiou lia.”

<sup>21</sup> Kaba tara tei Israel alia e poeiegu,

“Alia e kaloho nitōa ragu u katuun te raman hengo nariou lia bate hipus korur.”

## 11

### *E Sunahan e taatagi rena a tei Israel*

<sup>1</sup> Ba lia te rangatagu, e Sunahan e tori tsugari u katuun i tanen u Jiu? E möa koru. Alia has a toun Israel, a hatutubunei tere Abraham, a pala tere Bentsamen. <sup>2</sup> E Sunahan ema tori tsuga rai u katuun i tanen u Jiu. Nonei e hopö kap raiou lam i mam noa. Alimiou e atei silemiou u raranga

туру Buku u Göagono tara pöata te ranga meia e Ilaitsa e Sunahan. <sup>3</sup>Nonei e ranga silir a tei Israel me poeiena, “O Tsunono, nori i atung hamatir u propet i tamölö bate rureier a man makumun haats i tamölö. Alia puku lasi a töa te kagu, na nori e ngilin atung hamate has nariou lia.” <sup>4</sup>Be Sunahan e ranga palisena e Ilaitsa me poeiena, “E möa. A 7,000 tara katuun i tar e kar tema hatsunoneri u kesa u lillahanei e Baal. Alia e taguhu ragouen.” <sup>5</sup>Na e kato has uana iesana i romana. A hun katuun te hopö kapiin e Sunahan e ka noana, taraha nonei e taatagi ranen. <sup>6</sup>Nonei ema hopö kap meraien ti kato haniga uaien. E möa. Nonei e hopö kap raien, taraha nonei e roron taatagi rena u katuun. Te kui beria u katuun e Sunahan be Sunahan te taatagi ranen, a ka teka ema ngöeri a nitaatagi. E möa.

<sup>7</sup>Baha hamanasa? A tei Israel ima lue ii a ka ti ngileien. A matsi töa puku lasi turu katuun ti sabe a ka teka, u katuun te hopö kapir e Sunahan. Kaba a pal parpara koru a tori ren e kihil lasi. <sup>8</sup>Ti mar koloto noahas menaien turu Buku u Göagono:

“E Sunahan e hala raien u namnamei tema tagala bala nei,  
u mata te tarana kaba ema tara hamana nei  
na u talinga te hengona kaba ema hengo  
hamana nei.”

<sup>9</sup>Na e Dedit a King e pei hasi i manasa:

“Pöata te katoe roien a kannou te ngil korue ren,  
ba lö te kato homi mera mien a kannou,  
te kato uana a tanga na a kiou te hatongo kap  
nena a poum a hie.  
Alö go hahuna raien.

10 Hakuhil a mataren ba nori tema tatei tara roi, balö te kato hamuri tukul nitöa nem a muriren.”

11 Ba lia te rangata ragou limiou, u Jiu i rus be rus hakapa nitöar? E möa koru! E Sunahan e taguhir u katuun tema Jiu ri. Nonei e kato uu teka tego kato hahiomor merien u Jiu. 12 Na pöata ti kato homi ia u Jiu, be Sunahan e kato haniga rena a palair u katunura i puta. Te kato tala uanen teka, be Sunahan te hala nanou a nisasaala pan tara pala tema Jiu ri tara pöata te la pouts ruma romana u Jiu hoboto tere Sunahan.

*E Sunahan e lu pouts rena u katuun tema Jiu ri*

13 Na lia e ranga gia i tamilimiou u katuun tema Jiu ri. Alia a aposol te hala mena lei e Sunahan i tamilimiou u katuun tema Jiu ri, na lia e ngil koruegu a toukui i tar. 14 Alia e kato silegu tegi hiomi uu katuun i tar, bate habirits pouts menari u hakats i taren tere Sunahan be Sunahan te lu pouts ranou a palai i taren. 15 Pöata te rama raia e Sunahan u Jiu, nonei e aroho uu tara palair u katunura i puta me kapiena ranen. Kaba tara pöata te lu pouts ranouen u Jiu, ba nori te here koru roi u katuun ti mate be töatöa poutsur.

16 Te hala naria a hamuna tere Sunahan, e here nei e Sunahan e teiena a huhua hoboto. Na te nigana a polososo turu ruei, ba man kala i tanen te niga hasir. Na e kato has uana iesana turu Jiu. U tuburen i manasa i pala uu tere Sunahan, na nori has e pala uariou tere Sunahan.

17 U Jiu e hereri u ruein olip u niga, na limiou u katuun tema Jiu mi e heremi u ruein olip u hie. E Sunahan e peko ban a palaina a kala turu

ruei u niga, ba nonei e hasopena a man kala turu ruei u hie tara makum i taren. Na limiou u katuun tema Jiu mi e luemiou a manka man niga turu Jiura i manasa. <sup>18</sup> Mōa tu saalaiam bate omi ramiou a pala ti peko ba here rai u kalan ruei. Alimiou goma pei mi alimiou e niga bala talamiau. Alimiou e heremi a kalan ruei tuun. Alimiou ema hauemi a polosona u ruei. E mōa. A polosona u ruei te haua ranou limiou.

<sup>19</sup> Kaba limiou e pei toume mou, “Aa, kaba a kala i peko sila nai tego lu mei lam a makum.”  
<sup>20</sup> E manana. Nori i peko ba merai tima hamana uaien. Kaba limiou e ka sila tuun mia turu nihamana. Bara! Ka haniga talaiam batema saalemi a peisamilimiou. E mōa. Alimiou go matout iam. <sup>21</sup> Taraha, e Sunahan e luban a palaina a man kala turu ruei u niga, na nonei e luba has ranou limiou te markato uamou limiou ti markato uaien. <sup>22</sup> E Sunahan e taatagi rena u katuun, na nonei e hahuna has rena u katuun. Rōto: nonei e hahuna rena a pala te kato homir, na nonei e taatagi has ranou limiou, tego haniga noahas uaiam limiou i tanen tara nihitaguhu i tanen i tamilimiou. Te mōa nen, ba nonei te luba has ranou limiou. <sup>23</sup> Be Sunahan te haka pouts ranoua u Jiu tara makum a niga i taren tegi hamana lel uaien i tanen. Taraha, nonei e ka mena a nitagala tego haka pouts meraien. <sup>24</sup> Na limiou u katuun tema Jiu mi i ngats ba raia turu ruei u hie bate hasopo raria turu ruei u niga tema ruei uai i tamilimiou. Na u Jiu e hereri u ruei u niga. Na ema tutu koru nei tega haka pouts menai e Sunahan u Jiu tara makum a niga tika mam ien.

*E Sunahan e taatagi rena u katuun hoboto*

<sup>25</sup> A matsi hahatoulana, alimiou goma pei mi alimiou e atei korumiou. Alia e ngilegu alimiou go atei sileiam u raranga u mana teka te mous i manasa: e kato uana teka, a nihhipus tara tei Israel ema ka nitöa noi romana. E möa. E antuna noa romana tara pöata te onoto noua u hihase turu katuun tema Jiu ri te pala uaier tere Sunahan.

<sup>26</sup> Be Sunahan te töan lu pouts ranou a tei Israel hoboto. Ti mar koloto has menaien turu Buku u Göagono:

“A katuun te taguhu ranou u katuun bate lu pouts ranen ena la nama romana i Saion.

Nonei e luba nanou a man markato a man omi tara pala tere Jekop.”

<sup>27</sup> Na e Sunahan e pei hasi,

“U rangan hatangana tu kits gono meraien lia e butu hamana noua tara pöata te luba negoa lia a man markato a man omi i taren.”

<sup>28</sup> U Jiu e hereri u pakö tere Sunahan, taraha nori e tori tsuga ba ner u Bulungana u Niga. Na ka teka e taguhu ranou limiou u katuun tema Jiu mi. Kaba e Sunahan e hopö kap noa hasir u tuburen. Nonei e hakats nena a ka teka bate taatagi has rena u Jiu. <sup>29</sup> Taraha, e Sunahan ema palise ii u hakats i tanen turu katuun te hopö kap raien na te kato hasasaala raien. <sup>30</sup> Alimiou uma hengoe mi e Sunahan i manasa, kaba i romana e Sunahan e taatagi ranou limiou, taraha u Jiu e lagi hengor.

<sup>31</sup> Nori e lagi hengor i romana, bate markato uana teka, e Sunahan e taatagi pon ranouen romana temar taatagi mera neien limiou. <sup>32</sup> E Sunahan e poeiena u katuun hoboto e lagi hengor bate here



nei a markato a omi e kits kap ranen. Te markato tala uanen teka ba nonei te taatagi rena u katuun hoboto.

### *Aragi solosei e Sunahan*

<sup>33</sup> A mamanaka hoboto tere Sunahan e pan koru ba ranou ra. A niatei na u hakats i tanen e pan saluhe koru nena a niatei na u hakats i tarara. E möa koru ta töa tega antunan sabi temar hakats sila uanen na temar mouna koru uana a markato i tanen. <sup>34</sup> Te mar ranga has uana u Buku u Göagono: “Esi te atei silena u hakats tara Tsunono?

Esi te antunan hatei neien ta ka tego ka-toeien?

E möa nitöa.”

<sup>35</sup> Na u Buku u Göagono e pei hasena:

“Esi te hala mamei a Tsunono ta ka bate poeiena a Tsunono ega paliseien?

E möa nitöa tala.”

<sup>36</sup> Taraha, e Sunahan e habutu a mamanaka hoboto na nonei peisa a mouna a mamanaka, na manka hoboto e ka uana i tanen. Ba ra te solosei nitöa tala nera e Sunahan. U mana.

## 12

### *A markato te sasaala mena e Sunahan*

<sup>1</sup> A matsi hahatoulana, e Sunahan e taatagi koru ranoura. Na lia e ranga hataatagi mera goulimiou, alimiou go hala koru niam a peisa milimiou bate here nei u haats u tötöa tere Sunahan bate herenei a ka a gogoso te haleri e Sunahan ba nonei te hanigeie nen. Nonei a maroro te tatei mar hat-sunono sila mena milimiou e Sunahan. <sup>2</sup> Alimiou goma kukutiemi a markato tara han i puta teka. E möa. E Sunahan e ngilin hala ranei limiou u

hakats u tsimus bate habiritsena a torimilimiou ba limiou te atei sile mou u ngil tere Sunahan bate hanigei men, a ka te nigana na ka te sasaala mena e Sunahan na ka te matskö nitöana.

<sup>3</sup> E Sunahan e taatagi sileiou lia be hale nei lia a nikapan tara aposol. Na lia te ranga mera goulimiou hoboto a man tötöa, alimiou goma poeiemi alimiou e kapan miou. E möa. Hakats hamatskö naiam a peisa milimiou a man tötöa e antunana te mar hamana uami limiou, bate katoemiou a toukui te matsköna, taraha e Sunahan e hala hoboto raira a nihamana. <sup>4</sup> A peisana a katuun e ka mena a makum a parpara, na nori hoboto e ka mer a man toukui i taren. <sup>5</sup> Na e kato has uana iesana turu kristen. Ara e parpara ra kaba ra a töa hun katuun puku noahas te hamana uara tere Kristo. Ara a töa a hun katuun bara te hihitaguhira. <sup>6</sup> E Sunahan e hala raira a man tötöa a man nitagala tegi kato haniga menai ra a mamana mar toukui. Te haleia lö e Sunahan a nitagala tego lu menai lö u ranga hamatskö i tanen bate rararie men, ba lö te rarare hapopo namien te mar hamana uamölö. <sup>7</sup> Te haleia lö e Sunahan a nitagala tego taguhu menai lö a tai, balö te hitaguhu hasim. Te haleien lö a nitagala tego hihatuts uu lö, balö te hihatuts hasim. <sup>8</sup> Te ka memia lö a nitagala tego hatagala menai lö a nihamana tara palai, balö te kato hasemen. Te hitaguhu mia lö tara moni, alö a tatangana. Te tara kap ramia lö a palai, ba lö te hipakoko hanigam batema karousmi. Te taatagi sile mia lö a palai, balö te taguhu ramen bate sasaalam.

<sup>9</sup> Alimiou go hiangilngil hamana iam ba tema gamo mi. Rama naiam a ka te omina bate pile

kap namiou a ka te nigana. <sup>10</sup> Hiangilngil iam te kato uar a man hahatoulana hamana. Na limiou go hapaneiam a tai i tamilimiou. <sup>11</sup> Alimiou go kui hatagala iam batema karousmi. A torimilimiou ega sasaala koru te kui bemi limiou a Tsunono. <sup>12</sup> A ka te hamana sile milimiou e tatei hasasaala ranou limiou. Te butuna u tori tiama, ba limiou te tuatamimiou. Alimiou go singo nitōa uaiam tere Sunahan. <sup>13</sup> Alimiou go hala has rami a palair u kristen a manka i tamilimiou, bate lu has merami u katuun i luma i tamilimiou.

<sup>14</sup> Kato haniga raiam u katuun te kato homi rariou limiou, ne möa tu ranga hohomir, singo be ramia tere Sunahan ega taguhu raien. <sup>15</sup> Sasaala gono me raiam a pala te sasaalar, bate tabe gono has meramiou a pala te taber. <sup>16</sup> Kaka haniga gono meraiam u katuun, möa tu hapanpan iam. Kaka haniga gono meraiam u katuun papala, ba tema pei mi alimiou lahas te ka memiou a niatei.

<sup>17</sup> Te kato homina a katuun i tamölö, möa tu palisi. Kato sil a markato a niga te hanigeier u katuun hoboto. <sup>18</sup> Torohana hatagala sil tego ka haniga koru merai lö u katuun hoboto. <sup>19</sup> A matsomi, e möa koru tego hipou uaiam limiou. Nonei a ka peisa tere Sunahan. Taraha, i koloto naia turu Buku u Göagono te pei menai e Sunahan, “Alia te hipou gou. Alia te palise gou a markato a omi.” <sup>20</sup> Na u Buku u Göagono e pei hasena:

“Te besna a katuun te rarahe noulö, balö te hanoue men.

Na te makana a katuun te rarahe noulö, balö te haue men.

Te markato uamoulö teka,  
balö te kato hamatsingole men.”

<sup>21</sup> A markato a omi ema tatei tagala saluhe ranei limiou. E möa. Alimiou go tagala saluhe naiam a markato a omi te haröto menami lö a markato a niga.

## 13

### *Aragi tara marei a gamman*

<sup>1</sup> U katuun hoboto egi kukuti a gamman. Taraha, e möa ta töa ta gamman tega butu peisa. E Sunahan te hatuol a gamman hoboto me hala raneien a nitagala. <sup>2</sup> Na katuun te hipus nena a gamman nonei e hipus has nena a ka te hatuoli e Sunahan. Na katuun te markato uana teka e hahune riou. <sup>3</sup> Taraha, u katuun tara gamman ema kato hamatout rari u katuun te kato hanigar. E möa. Nori e kato hamatout raier u katuun te kato homir. Alö go kato haniga balö tema tatei matoutemi a katuun tara gamman, ba nonei te haniga hase noulö. <sup>4</sup> Taraha, nonei e here nei a katunun kui tere Sunahan bate ka silena tego taguhu menaien lö. Kaba te kato homi mialö, balö te tatei matoute men, taraha nonei e ka mena a nitagala tego hahuna menaien a katuun. Nonei a katunun kui tere Sunahan na nonei e hahuna rena u katuun te kato homir bate kato haraharher e Sunahan. <sup>5</sup> Na limiou ego kukute mia tara gamman, taraha alimiou e atei silemiou a ka te nigana, na e atei sil hasemiou e Sunahan e raharaha rena u katuun te kato homir.

<sup>6</sup> Nonei a ka te hol sile milimiou a takis, taraha u katuun tara gamman e kui beier e Sunahan te katoe rien a toukui i taren. <sup>7</sup> Alimiou go hala naiam a mamana takis turu katuun te lulueier a

takis. Na limiou go hapan has raiam u katuun te panir bate solosei ramen.

*A markato turu kristen*

<sup>8</sup> Hakapeiam a man haroho hoboto i tamilim-iou, kaba ma hakapemi a markato te hiangilngil uaier. Te ngile mia limiou a tana katuun, alimiou e katoe miou a ka te kato silena a Lo tere Sunahan.

<sup>9</sup> U raranga u kapan te poeiena, “Alö go ngil koru menai a tana katuun temar ngil has mena milö a peisamölö.” U raranga teka nonei a mouna u raranga te poeiena, “Alö goma tsikolo ii. Alö goma hihipöli ii. Alö goma kop ii. Alö goma tortor sile ii a ka tara tana katuun.” Na a markato tego ngil menai lö a tai e mouna has uana tara palaina u raranga. <sup>10</sup> Te ngil menami limiou a tana katuun, alimiou ema kato homie mien. Na markato turu ngilngil nonei a mouna a ka te kato silena a Lo tere Sunahan.

<sup>11</sup> A hapalana a ka teka, alimiou e atei silemiou a mar pöata teka. Möa tu sohoiam, a pöata te lu pouts ranoa ra e Sunahan e sulusuku nena a pöata ti hamana tania iara tere Kristo. <sup>12</sup> A pöata a omi teka te here nei a bong e katsin kapana, na pöatan pepeito kap tara nitsunono tere Kristo te here nei a lan e sulusukuna. Aragi hanöa a markato a omi te ka uana turu kuhil bate katoera a markato a niga te ka uana turu ualesala. <sup>13</sup> Aragi kato hamatskö, te kato uaria u katuun tara lan. Aragi ma kukutiei a markato te kato homi ria u katuun tara pati na te spak uar na te tsikolo uar na te hakats homi uar na te raharaha uar na te hiomi uar. E möa. <sup>14</sup> Alimiou go katoeiam a markato tere Iesu Kristo a Tsunono. Alimiou ema tatei kukute lenemi u ngil turu tuenrei i tamilimiu.

# 14

*Alimiou goma pei mi e toulamilimiou e kato homina*

<sup>1</sup> Alimiou go las ramuma u katuun a nihamana i taren tema pan bala nei. Kaba möa tu hia raharaha gono meraiam te ka merien u nihamana te halhalina. <sup>2</sup> A palaira u katuun e atein nouer a mamana kannou, kaba katuun u nihamana i tanen tema tagala nei e atein nou tuun nena u pelö.\* <sup>3</sup> U katuun te tatei nouer a mamana ema tatei ranga sil rari u katuun te agonor, na u katuun tema nonou bala ri egima ranga sil has rai u katuun te nonou palar. Taraha, e Sunahan e haniga hase nen. <sup>4</sup> Alö a saha mar katuun koru balö te ranga silemou a katunun kui tara tana katuun? A katunun hakui peisa i tanen te tatei poeiena, e kui hanigana tsi e kui homina. Na nonei e kato haniga nou, taraha a Tsunono e antunan taguhe nen.

<sup>5</sup> A taina katuun e tatei poeiena a palaina u lan e panir na palaina u lan e möa. Na taina katuun e tatei poeiena, a man lan hoboto e kato uana iesana. Bara. A man tötöa a man katuun egi atei haniga sil temar hakats uaren. <sup>6</sup> U katuun te poeier u töa u lan e kapanina e ngilin hapan berien a Tsunono. Na u katuun te nour e nou meri a mamana kannou tega solosei mena neien a Tsunono, taraha nori e haniga has uar tara Tsunono. Na katuun te agonona e ngilin hapan

---

\* **14:2:** A katuun a tagala e ranga nena, a katuun te kamena u nihamana u kapan. A katuun tema tagala nei bate nou tunena u pelö e ranga nena, a katuun u nihamana i tanen tema tagala nei.

hasena a Tsunono, ba nonei te haniga has uana tere Sunahan. <sup>7</sup> Ara ema tötöa sila ria turu ngil i tarara, e möa. Na ra ema mate has meroi u ngil i tarara. E möa. <sup>8</sup> Ara e tötöa silera tegi kato hasasaala mei a Tsunono. Na nimate has i tarara, a ka peisa noahas tara Tsunono. Te tötöa ria ra tsi te mate ria ra, ara u katuun tara Tsunono. <sup>9</sup> Taraha, e Kristo e mate me tötöa pouts silena tego Tsunono uen turu katuun te tötöar na turu katuun ti mate. <sup>10</sup> Aha te ranga sil memilö e toulamölö tsi e hahinamölö? Aha te tara puta sile milö e toulamölö tsi e hahinamölö? Taraha ara hoboto ena tuol roua i matana e Sunahan. <sup>11</sup> I koloto has naia turu Buku u Göagono ba Tsunono e poeiena:

“Ü mana koru alia e hatei ragou limiou,  
u katuun hoboto e hatukun roua i matar.

U katuun hoboto e hatsunone riou romana lia  
ba nori te poe riou alia lasi a töa e Sunahan.”

<sup>12</sup> Ba ra hoboto a man tötöa te hahatei roi e Sunahan a mouna a man markato ti katoeia ra i puta.

<sup>13</sup> Ara gima ranga sil lele ii a taina katuun tara markato i tanen. Kaba ragi hanöa nitöani te ranga sil menarira a taina katuun bara te kato homi raren turu hakats na tara markato i taren. <sup>14</sup> Alia e atei silegu na e Iesu a Tsunono e haröte ii lia a ka te markato uana teka, e möa ta ka i tanen peisa ega omi. Kaba te poeiena a katuun e omina ba ka teka te omi hasna i tanen. <sup>15</sup> Te omi silana a hahatoulana i tamölö tara ka te noue mölö, e hatei nena alö ema ngil hamane mien. Taraha, nonei e kukutiena a markato i tamölö bate kato homiena a torinen. Kaba e Kristo e mate sil hasi a hahatoulana i tamölö. Tara kap haniga talein a ka te noue mölö. Nonei e namots kukutiena

a markato i tamölö bate kato homi hasena a peisanen. <sup>16</sup> U katuun e namots ranga homi ner a markato te nigana i mata mölö. <sup>17</sup> Taraha, a Nipepeito tere Sunahan ema kannou nei na ema kaan ua nei. E möa. A Nipepeito tere Sunahan a mouna a markato a matskö i matana e Sunahan na masalohana na nisasaala te hala ranei ra u Namnamei u Göagono. <sup>18</sup> Na katuun te kui beiena e Kristo tara markato teka, e Sunahan na u katuun has e hanige ren.

<sup>19</sup> Na ragi kute sil korui a markato te hagumena a niniganiga na te hatakei hanigeiena a katuun na te hagum haniga rena ra hoboto. <sup>20</sup> Alö goma kato homiei a toukui tere Sunahan te ngilin nou mena milö a mamana kannou. E niga hasina te nou menari a mamana kannou, kaba e omina te nouena a katuun a töa ka bate kato homiena u hakats tara palair u kristen te poeier e omina. <sup>21</sup> E nigana te raman nou mena milö u benö na te raman ua mena milö u uain na tema ngilin kato memilö ta ka te kato homie nou u hakats tara hahatoulana i tamölö. <sup>22</sup> A nihamana te ka memölö emu ka lö peisa i matana e Sunahan. Pöata te katoe mia lö a ka te pei milö e nigana ba torimölö tema pei nei e omina, alö e sasaala mou. <sup>23</sup> Kaba te hula hakats mia lö te noue mia lö a ka, alö e kato homi hamanasam, taraha alö ema hamanemi tega niga uen. A saha ka te katoe mölö tema la na meia tara nihamana, nonei a markato a omi.

## 15

*Aragi kato hasasaaler a palai*



<sup>1</sup> Ara te atei haniga silera u hihatuts tere Sunahan ega taguhir a pala tema atei hanigari. Ara gima hakats sile ii tegi sasaala peisa uu ra. E möa. <sup>2</sup> Ara a man tötöa gi kato hasasaaler a man hahatoulana i tarara ba ra te taguhu raren bate hatagala raren. <sup>3</sup> Taraha, e Kristo has ema kato sile ii tega hasasaala peisa menaien a peisanen. E möa. Ti mar koloto has menaien turu Buku u Göagono te poeiena, “U ranga u omi turu katuun ti ranga homi na ioulö e rus uanama i tar.” Na ka teka e butu hamanaia tere Kristo. <sup>4</sup> A mamananaka ti koloto naia turu Buku u Göagono i koloto sile ii tega hatuts meraien ra na tega hala meraien ra u rangan hitaguhu ba ra te hahalosera a manka man niga tere Sunahan bate hamana sile ren. <sup>5</sup> E Sunahan te tuol hatagala nitöana na te hatagala nitöa ranoura ega hala rai limiou a masalohana bate kukutemiou a markato tere Iesu Kristo. <sup>6</sup> Te markato uanen teka ba limiou hoboto te tatei soloseie miou e Sunahan, e Tamana a Tsunono i tarara e Iesu Kristo.

*U Bulungana u Niga te la uu turu Jiu na turu katuun tema Jiu ri*

<sup>7</sup> Hianiganigaiam, temar haniga has merai e Kristo alimiou, ba markato teka te soloseie nou e Sunahan. <sup>8-9</sup> Alia e hatei ragou limiou, e Kristo e butun katunun kuia turu Jiu, taraha nonei e ngilin harötein e Sunahan e kato hatagali u ranga hamana te hala naien turu tubur u Jiu bate butu hamanana, na e ngil hasi u katuun tema Jiu ri egi solosei meien a nihitaguhu i tanen. Ti koloto has menaien turu Buku u Göagono: “Alia e habulungana nagoua lö, o Sunahan,

i gusur u katuun tema Jiu ri,  
bate kōma hasasaale goulö.”

<sup>10</sup> Na u Buku u Göagono e pei hasena:

“Alimiou u katuun tema Jiu mi go sasaala gono  
meiam  
a pala tere Sunahan!”

<sup>11</sup> Na ti koloto lel has menaien:

“U katuun hoboto tema Jiu ri egi solosei a  
Tsunono.

U katuun hoboto gi söata sei koru a solonen.”

<sup>12</sup> Na e Aisaia a propet e pei hasi:

“A töa hatutubunei tere Jesi e la nama romana.

Nonei e söata sei sile roi romana tega tsunono  
meraien u katuun tema Jiu ri.

Ba nori te hamane rouen.”

<sup>13</sup> E Sunahan e tatei hala ranei ra u raranga  
hamana tegi hamana sil menaien ra. Nonei e  
tatei kato hasasaala ranou limiou bate hala ranei  
limiou a masalohana te hamana uami limiou i  
tanen. Ba u Namnamei i tanen te hala ranoui  
limiou a nitagala tego hamana nitöa uamia limiou  
turu raranga hamana i tanen.

### *A ka te koloto hatagala sil e Pol*

<sup>14</sup> A matsi hahatoulana, alia e hamanegu alim-  
iou u katuun u niga koru ba limiou te ka memiou  
a niatei te antunan hatuts pouts memi limiou a  
peisamiou. <sup>15-16</sup> Kaba turu pas teka alia e ranga  
hatagala noa has negu a palaina manka tego  
hatakei menai u hakats i tamilimiou. Alia ema  
matout megì e Sunahan e hale ii lia a nitsunono  
tego katunun kui uu lia tere Iesu Kristo bate kui  
silegu u katuun tema Jiu ri. Alia e katoegu a  
toukui turu pris bate rarariegu u Bulungana u  
Niga tere Sunahan. Alia e kato silegi a ka teka

u Namnamei u Göagono e tatei kato haniga rena u katuun tema Jiu ri i matana e Sunahan, be Sunahan te lu ranen. <sup>17</sup> Alia e sasaala koru megu a toukui i tar, taraha alia e kato begien e Sunahan tara nitagala tere Iesu Kristo. <sup>18-19</sup> Alia ema hatei nagi a palaina toukui i tar, kaba lia ema matoutin hatei nagi a toukui te kato sila naia e Kristo i tar, tegi taguhu merai u katuun tema Jiu ri bate hengoeier e Sunahan. A toukui teka alia u kato meien u raranga na markato a niga, na u mirakol, na nitagala turu Namnamei tere Sunahan. Alia u taniaia i Jerusalem me la nitöa uagu i Ilirikum tu hatei lala naia lia a man ranga hoboto turu Bulungana u Niga tere Kristo.

<sup>20</sup> I manasa na te antunana i romana, alia e ngilin rarariegu u Bulungana u Niga turu han tima hengo noa nai e Kristo. Taraha, alia e namots hapona gia tara toukui te hatania a tana katuun tere Sunahan. <sup>21</sup> Kaba ti mar koloto noahas menaien turu Buku u Göagono:

“U katuun tima hengo noa nai u bulungana i tanen ena tara marei riou.

Na u katuun tima hengo naian ena atei sile rouen.”

### *Pol e ngilin la uu i Rom*

<sup>22</sup> Nonei a ka tuma antunan na tara merai lia limiou. <sup>23</sup> Kaba lia u hakapeia a toukui i tar tara man han teka, na lia e ngilin na tara hamanasa ragou limiou, taraha alia u solon hahaloso tego na tara merai limiou. <sup>24</sup> Na lia e ngilin tara ragou limiou bate töan la sokö uagu i Spein. Na te kapa talana u ngil tego ka hoboto gono merai lia limiou, ba limiou te taguhe moulia te la uagu lia i Spein.

<sup>25</sup> Kaba lia e mam bua gou i Jerusalem batena taguhu regu a pala tere Sunahan. <sup>26</sup> Taraha, a hun katuun tere Kristo i Masedonia na i Gris e hala naier u moni tegina taguhu merai u katuun tere Kristo i Jerusalem ti möa ta ka. <sup>27</sup> Nori e kato merien u ngil peisa i taren. Na e niga hasina te kato uaren teka. Taraha, u Jiu i halan a manka a man niga tere Sunahan turu katuun tema Jiu ri, ne niga hasina te taguhu has mera raien u Jiu a manka man niga i taren i puta. <sup>28</sup> Alia ena hala bura goien a moni hoboto ti gono menai i taren, balia tena töan tara ragou limiou te la goua lia i Spein. <sup>29</sup> Tena tara ragoua lia limiou, alia e atei silegu alia e la megou a kaan hasasaala tere Kristo te kato hasasaala koru ranou limiou.

<sup>30</sup> A matsi hahatoulana, alimiou e ka uamiou tere Iesu Kristo a Tsunono i tarara, na u Nam-namei i tanen e hatei raira tegi hiangilngil uu ra. Na lia e ranga hatagala meragou limiou, alimiou go singo taguhe moulia tara ka te singo sil hase gulia. E markato uana teka, alimiou go singo hatagala uaiam tere Sunahan bate taguhe noulia. <sup>31</sup> Singo sileiam tegima kato homi menai lia u katuun i Judia te hahamanar, na tegi haniga menai u katuun tere Sunahan i Jerusalem a monin hitaguhu teka te söata mena goi lia i taren. <sup>32</sup> Te haniga noa e Sunahan, balia tena butu megoua a nisasaala pan i tamilimiou, ba ra te sasaala hobotora. <sup>33</sup> E Sunahan te hala ranei ra a masalohana e tatei ka gono mera noulimiou hoboto. U mana.

*E Pol e halan u hanhaniga i tanen tara man tötöa man katuun*

<sup>1</sup> Alia e ngilegu alimiou go hanigeiam e Poebe te butu noen romana i tamilimiou. Nonei a hahahinana i tarara tara pala tere Kristo na e kui beiena u katuun tere Kristo i Senkria. <sup>2</sup> Lu menami a tahol teka i tamilimiou, taraha nonei e pala uana tara Tsunono. E nigana te markato uaier u katuun tere Sunahan teka. Na limiou e tatei taguhe men tara saha ka te ngile nen. Taraha, nonei e taguhe ioulia na katuun a parpara.

<sup>3</sup> Alia e haniga uagu tere Priska na tson i tanen e Akuila. Nori na lia, alam u kui hoboto uu tere Iesu Kristo. <sup>4</sup> A tsitabubu koru ba nori te atung hamate sil rari ti taguhu menaien lia. Alia e haniga koru uagu i taren, na pala hoboto tema Jiu ri e haniga has uaier i taren. <sup>5</sup> Batena hala has namou a niniganiga i tar turu kristen te roron hagum hoboto ria tara luma i taren.

A niniganiga has i tar tere Epinitus a tsomi koru i tar. Nonei a katuun tutuun tara provins i Eisia te hamana uu tere Kristo. <sup>6</sup> A niniganiga has i tar tere Maria, te kui hatagalaia i gusumilimiou. <sup>7</sup> Na hala has namou u hanhaniga i tar tere Andronikus mere Junias, nori a hun katuun i tar ti ka gono meia lia tara karabus. U aposol e atei sil haniga raren, na nori i hamana mam naia lia tere Kristo.

<sup>8</sup> Na niniganiga has i tar tere Amplietas te ngil korue gulia te pala uanen tara Tsunono. <sup>9</sup> Haniga be hase mou lia tere Erbanus te kui gono meraiou ra tere Kristo, na e Steikis has, a tsomi i tar. <sup>10</sup> Na hala has naiam u hanhaniga i tar tere Apelis. U katuun e atei siler te kukute haniga menaien e

Kristo. Haniga has raiam a pinaposa tere Aristabibilas. <sup>11</sup> Na a niniganiga has tere Herodian a töa han i tar, na pinaposa tere Narsisas te pala has uaier tara Tsunono.

<sup>12</sup> Na lia e haniga has uagu tere Traipina mere Traiposa, te kukui ber a Tsunono, na tere Pesis a tsoni i tar te kui hapara koru has bei a Tsunono.

<sup>13</sup> Hala has naiam u haniga tere Rupas, a tsoni koru tara Tsunono, na tere tsinanen has te kato here nai lia a pien i tanen. <sup>14</sup> Na haniga has raiam ere Asingkritus mere Pligan ne Hermis ne Patrobas ne Hermas na palair u kristen has te ka gono mera ren. <sup>15</sup> Na haniga has mia tere Pilalogas mere Julia ne Nirias mere hahinanen ne Olimpas na u kristen hoboto te ka gono mera ren.

<sup>16</sup> Haniga has raiam a man tötä i tamilimiou. A man hun katuun hoboto te hatsunoner e Kristo e hala has naier u hanhaniga i taren.

### *Urangan hakapa*

<sup>17</sup> A matsi hahatoulana, alia e ranga hatagala mera goulimiou, hanei sil raiam u katuun te roron lu kata rer u katuun ba nori tema hamana hanigari. Nori ema hanigeri u hihatuts tu luema limiou i tamulam, möa tu hasukusuku mia i taren.

<sup>18</sup> Taraha, nori u katuun teka ema kui beri a Tsunono i tarara e Kristo. E möa. Nori e kui siler u ngilngilina i puta i taren. Nori e roron angoso rer u katuun bate gamo rer u katuun tema atei sileri a ka tema mana nei. <sup>19</sup> U katuun hoboto e atei siler alimiou e hengoe miou u Bulungana u Niga, na lia e sasaala koru mera goulimiou. Kaba lia e kato silegu alimiou go atei sil hanigeiam a markato a niga bate tutu ba namiou a markato a omi. <sup>20</sup> E

Sunahan tara masalohana e tö mismisase noua e Satan i kopina pitapitana mou milimiou.

A nihitaguhu tara Tsunono i tarara e Iesu Kristo e tatei ka gono mera noulimiou.

<sup>21</sup> E Timoti a katuun te kukui gono megu lia e hala ranei limiou a niniganiga i tanen. Na e Lusius ne Jeson ne Sosipater has, nori a hun katuun i tar, e hala has ner u hanhaniga i taren i tamilimiou.

<sup>22</sup> Alia e Tesias, alia te koloto negu u raranga tere Pol na te pala gono mera gou limiou tara Tsunono, e hala has ragi limiou a niniganiga i tar.

<sup>23-24</sup> Na e Gaius has, a luma i tanen te ka gia lia na te roron lotu has ria, e hala has nena a niniganiga i tanen i tamilimiou. E Irastas a kuskus tara gamman tara taun teka na hahatoulana i tarara e Kuortus, nori e hala hoboto has ner a niniganiga i tamilimiou. A nihitaguhu tara Tsunono i tarara e Iesu Kristo e tatei ka gono mera noulimiou hoboto. U mana.

### *Aragi solosei e Sunahan*

<sup>25</sup> Aragi solosei e Sunahan! Nonei te antunan hatagalena u nihamana i tamilimiou ba limiou te hamana mia i tanen, te hengo mena milimiou u Bulungana u Niga te rararie gulia, na turu raranga te hatei nena e Iesu Kristo. Nonei u raranga teka e solon mous i manasa. <sup>26</sup> Kaba i romana e butu halesalana i matar u katuun. Na u raranga ti kolotein u propet e halakasi a nimana tere Sunahan, a Sunahan te ka nitöana. E Sunahan e hakei u raranga u tagala tegi habulungana menai u raranga teka turu katuun hoboto, ba nori te tatei hamana ria i tanen bate hengo hase ren.

<sup>27</sup> Aragi solosei nitöani e Sunahan nonei lasi a töa te atei silena a mamanaka hoboto. Nonei e tatei lu sila nena a solo pan tara toukui pan te katoe e Iesu Kristo. U mana.

Alia e Pol



**U BULUNGANA U NIGA**  
**The New Testament in the Halia Language of Papua**  
**New Guinea**  
**Nupela Testamen long tokples Halia long Niugini**

copyright © 2020 Wycliffe Bible Translators, Inc.

Language: Halia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-08

---

PDF generated using Haiola and XeLaTeX on 8 Mar 2023 from source files dated 5 May 2022

03815460-d6a0-5a59-aa7b-2a4278f7e67d